



# BARINGKUAS

REBOLUSYONARYO A DYARYO TI UMILI ITI CAGAYAN VALLEY

TAWEN 2002 BLG. 5

ISYU TI NOBYEMBRE - DISYEMBRE

P10.00

## Gun-oden ti dakkel a panagdur-as ti rebolusyon ken dagiti benepisyo ti umili iti nairteng a laban ti umili ken iti tinipon a pigsa ti Hukbong Bayan



**A**grambak tayo gapu ta agtultuloy a sumaysayaat ti kasasaad para iti panagabante pay ti rebolusyon! Umad-adu nga umili ti agtartarigagay iti panagbalbaliw ti nakaro a magunggundawayan ken maidadan a kasasaad da. Tarigagay da a gun-oden ti karbengan, kinalabon, kinatalna, ken waya-waya. Ad-adu ti agtartarigagay a makangngeg ti rebolusyonaryo a propaganda ken lumaok iti dadakkel a panagtignay, karaman iti armado a pannakidangadang.

Mas dadakkel ti addang ti umili ita ta saan laengen a ti malakolonyal ken malapyudal a pagilian ti addaan awan resatna a krisis. Uray pay ti sangalubongan a kapitalista a sistema ket adda iti krisis a katukad ti Great Depression idi 1929 a nangiduron iti Maikaddua a Gubat ti Sangalubungan.

Napaneknekan a bangkrap ti patakaran a globalisasyon ti “nawaya a pagtagilakuan”. Nagsuek ti “baro nga ekonomya” ti US itay naudi a dua a tawen. Uray pay iti di maartapan a tukad, sobra nga inkonsentra ken napalalo nga insentralisa na ti kapital ti pinansya .

Awan maidiaya a solusyon ti agturturay a bunggoy a Bush iti US para iti kumarkaro a krisis, malaksid iti ad-adu pay a dosis ti pareho a “neoliberal” a sabidong, nanayunan

# LINAON

## EDITORIAL

- 1 Gun-oden ti dakkel a panagduras ti rebolusyon ken dagiti benepisyo ti umili iti nairteng a laban ti umili ken iti tinipon a pigsa ti Hukbong Bayan

## AGREB

- 4 Dagiti nasken a padur-asen iti panangitandudo ti rebolusyon agraryo

## TERORISMO TI ESTADO

- 8 Ti terorismo ti rehimen US-Macapagal-Arroyo
- 9 Anti-Terrorismo a Gannuat
- 10 Panangikuskuspil kadagiti karbengan sibil ken pulitikal
- 11 Didigra ti CAFGU iti Quirino
- 12 Dagiti panaglabsing ti 77th IB iti Zinundungan
- 12 Panagabusos ti Militar iti Bitag Grande, Baggao

## ARMADO A DANGADANG

- 13 Nabara ken nadungngo a panagakakaddua
- 16 Ti pannakaperdi ti Monumento ni Marcos

## 17 DAMDAMAG

## SALUN-AT

- 25 Paksiaten ti Malaria

## KULTURA

- 28 DANIW NI KA DALEN  
TAJANLANGIT: *Iti Ipapanaw Ko*

## KOMIKS

- 28 TANO: *Panagrambak iti anibersaryo*

## Manipud panid 1

ti gakat para iti panagpadakkel ti produksyon militar ken panggastos ti gubyrerno para iti militar ken depensa nga internal.

Duron ti krisis, ti imperyalismo a US ket lallalo a nagbalin a manangrribuk iti lubong. Mangirugrugi ken aktwal a manggububat kadagiti pagilian a gandat na a pagpespesan. Usaren na ti pasismo tapno lipitlipiten dagiti umili ti sangalubungan.

Awan ti maipagpannakkel ti kapitalismo iti umili ti lubong. Dinadael na ti nalawa a puersa ti produksyon; iti salisal ti agtultuloy a panagpadur-as iti teknolohiya iti ramit ti produksyon, awan sarday ti umad-adu a mangmanged ti maikkat iti pagtrabahuan. Binilyon nga umili ti nailumlom iti nakaro unay a panagrigrigat. Awan ti nalawag a masangoanan ti lubong iti awan ressatna ken kumarkaro a krisis.

Balbaliktaden dagiti propagandista ti imperyalista ti kinapudno. Ibagbaga da a naitabonen ti sosyalismo ken awanen ti maidasar daytoy iti umili. Ti kinapudno na ti kapitalismo ti mailumlom iti pakasaritaan. Ti “sosyalismo” a narebba iti USSR ken malunglungloten iti Tsina ket ti atrasado a kapitalismo a resulta ti rebisyunismo a nangrakrak iti pudno a sosyalismo.

Ti sosyalismo ket addaan nasayaat a rekord kadagiti umili iti USSR ken Tsina a nakapadas kadaytoy. Idinto ta nakaro ti kinarigat, riribuk ken kinakirang ti karbengan ti makitkita da ita ta kapitalismo ti agar-ari iti pagilian da.

Ilawag tayo daytoy iti tunggal umili a sangoen tayo tapno maaddaan da ti panangammo iti kinapudno. Saan a maputputed a kasla plaka a makatitileng dagiti irusrussuat a pulong-pulong dagiti MSOT ti militar kadagiti baryo a mangitamtambor nga awan ti masangoanan ti sosyalismo. Kadakkel ti kapre ti kinaulbod ken saywar dagitoy.

Nupay kasta, saan a sumagepsep daytoy iti adu nga umili. Gapu ta ania pay kadi ti kinabaknang da iti sidong ti kapitalismo? No di pulos kinabaknang ti lista iti utang iti nadumaduma nga usurero-negosyante. Ken pannakagundaway da iti gimong a pagar-arian ti dadakkel nga apo’t daga ken dakkel a burges-kumprador.

Kas iti nadumaduma a patakaran ti kapitalismo a napaneknekan a bangkrap ngem maul-ulit laeng iti nadumaduma a nagan ti iskema a kas iti klasiko a liberalismo, Keynesyanismo ken neoliberalismo ti globalisasyon. Kasta met dagiti istrategiya ti AFP a maisubli-subli ti dati a iskema iti baro a nagan kas ti Oplan Katatagan, Oplan Mamamayan, Total War ni dati a Presidente Aquino ken All-Out War ni Gloria Macapagal-Arroyo. Saan a maib-ibus ti baro a nagan iti daan ken maul-ulit a maretretoke a gakat ti AFP.

Ngem napunas da kadi ti CPP-NPA-NDF? SAAN! No di lallalo pay ketdi a dumakdakkal, lumawlaw ken pumigpigs. Apay? Gapu ta awit-awit daytoy ti interes ti umili, ti Nailian Demokratiko a Rebolusyon. Ken gapu ta naiballigian daytoy ti Maikadua a Tignayan a Panagilinteg.

Saan a kinabaelan ti reaksyunaryo a turay a lappedan ti panagdur-as ti rebolusyonaryo a puersa iti rehiyon. Agtultuloy ti panaglawa dagiti ili ken baryo a matigtignayan. Dumakdakkal ti bilang dagiti organisasyon masa, dagiti organisado a masa, dagiti aktibista ken dagiti maingatngato ti tukad nga organisasyon masa. Umad-adu ti Sangay ti Partido iti lokalidad ken Milisayang Bayan. Manipud Abril kadaytoy a tawen, awan ti kasualti tayo kadagiti labanan. Kabayatanna, ti kabusor ti natayan ti ad-adu a pakaibilangan ti maysa a CO ti kompanya.

Naballigian a nabukel tayo ti basaran a pormasyon kadagiti larangan a gerilya. Nangted daytoy ti kumpanya ken regta kadagiti gerilya. Dakdakkal ti naipatungpal a trabaho. Nakapangato ti moral ti masa ken akintengnga a puersa. Simmayaat ti kasasaad para iti opensiba militar. Ad-adu a masa ti nadanon ti rebolusyonaryo a propaganda. Nakarekoher ken naparpartak a nakonsolida dagiti tipak uray pay pinusisyonan ti kabusor ken pilit a nangriribuk da iti erya.

Dimmakal ti bilang ti baryo ken ili a namobilisa para iti agreb. Naiyabante ti kampanya para iti pannakaingato ti presyo ti produkto a saba ken mais. Naipababa iti 50% ti interes ti pautang. Panangted waya para iti dadduma a negosyante a makastrek iti ili para iti nangatngato a presyo. Saan a panagbayad ti utang no adda kalamidad. Maaddaan ti waya nga agilako ti produkto iti dadduma

pay a negosyante uray adda utang iti sabali.

Inkasa tayo ti laban iti panangagum ti nalawa a daga ni Danding Cojuangco ken Gobernador Faustino Dy, Jr. iti nalawa a daga iti Isabela, Cagayan ken Nueva Vizcaya a mamulaan ti kamoteng kahoy. Iti Cauayan, Benito Soliven ken Naguilian a pagluglugaran ti mina ken planta ti karbon. Iti manangallilaw, manangagum a programa ti CARP, ISF ken CBFM.

Iti panagiggem tayo iti interes ti umili ken militante a panangidaulo kaniada ken iti pinagtipon a pigs ti BHB, adda ti kumpanya tayo nga ad-adu pay a tipak ti mapusisyonan. Ad-adu pay ti yunit ti BHB ti mabukel tayo ken manipud ditoy ad-adu a sangay ti Partido, MB, dagiti organisasyon masa iti nadumaduma a sektor.

Addaan ti talek ti Partido iti intero a pagilian nga idur-as iti tallo a tawen a programa. Ti pangkabuklan a panggep ket natibker a ringbawan ti kumarkaro a panangraut ti reaksyunaryo a papet ti rehimen a US-Macapagal, ken idur-as ti demokratiko a rebolusyon ti umili iti nangatngato a tukad.

**K**araman tayo iti intero a pagilian a naregta a mangiyab-abante kadagiti kangrunaan a target a:

1. Palawaen ken pairtengen pay ti pannakidangadang nga anti-imperyalista, antipyudal ken

Duron ti krisis, ti imperyalismo a US ket lallalo a nagbalin a manangriribuk iti lubong. Mangirugrugi ken aktwal a manggubgubat kadagiti pagilian a gandat na a pagpespesan. Usaren na ti pasismo tapno lipitlipiten dagiti umili ti sangalubungan.







**Pudno nga awan maaramidan ti napipigsa ken nangangato't teknolohiya nga armas ti mananggundaway a dasig no ti umili ket addaan ti pangngeddeng a pagiggeman da ti turungen ti biag da.**

antipasista. Isina ken rebbeken ti reaksyunaryo a rehimen US-Macapagal. Ituloy dagiti napigsa a pannakidangadang ti umili uray pay masukatan ni Macapagal ti dadduma a dauilo a papet. Labanan ti umir-irteng nga interbensyon a militar ti US.

2. Sakupen dagiti larangan a gerilya ti kaaduan dagiti munisipalidad. Ken papigsaen dagiti rekisito para iti sumaruno a tukad ti panagpalawa ken paallon-allon a panagsagedsed pay iti tunggal munisipalidad. Pairtengen ti pannakidangadang gerilya. Palawaen ken pairtengen ti rebolusyon agraryo. Ken papigsaen ti kabaellan ti base a masa iti organisasyon, pulitika, militar, ekonomiya ken kultura.

3. Palawaen ken papigsaen pay ti panangidaulo iti umili a masa. Awisen ti minilyun-milyon nga umili iti benneg ti rebolusyon. Palawaen ken papigsaen ti silpo ken pannakitinnulong iti amin a posible nga alyado.

4. Papigsaen ti Partido iti ideolohiya, pulitika ken organisasyon. Dumur-as agturong iti panagbukel ti Partido a ginasut a ribo ti kameng na.

**P**artikular iti rehiyon tayo, ipinget tayo dagiti pagrebbengan nga:

1. Iyabante ti agraryo a rebolusyon kas kapatgan a tulbek ken panait a mangsarait iti trabaho iti kaawayan. Patignayen tayo ti masa iti

naduma-duma sa sakop kas iti purok, baryo, sumagmamano a baryo, ili, ken sumagmamano nga ili tapno magunod ti interes ti umili.

Kagiddan ti panangidur-as ti interes ti masa, ingato ti tukad ti konsolidasyon dagiti tipak ti baryo, apiten daytoy para iti mas panagpalawa dagiti larangan a gerilya.

2. Apiten ti balligi iti agraryo a rebolusyon ken ti naparang a tignayan iti syudad ken sentro dagiti ili iti panapigsa ti armado a dangadang. Iti panangpadakkel ti rekluta iti Hukbong Bayan. Iti panangibingay ti lohistika ken dadduma pay a suporta iti Hukbo. Iti panagtulong ken aktwal a pannakikuyog kadagiti taktikal nga opensiba ti Hukbong Bayan.

Napateg dagitoy dua a rebbengen tapno maipatungpal tayo ti mas panagdakkel pay ti kameng ti Partido, dagiti organisado a masa, aktibista, rekluta iti Hukbong Bayan tapno madoble tayo ti bilang ti larangan gerilya iti rehiyon. Makipaset tayo iti sangapagilian a panagpursigi a magunod ti nasurok kagudua ti bilang ti munisipyo iti pagilian iti uneg ti tallo a tawen.

Pudno nga awan maaramidan ti napipigsa ken nangangato't teknolohiya nga armas ti mananggundaway a dasig no ti umili ket addaan ti pangngeddeng a pagiggeman da ti turungen ti biag da.

Agrambak tayo ita nga aldaw. Aldaw a tumaktakder ti dasig a proletaryado iti Pilipinas tapno idur-as ti laban ti amin a maidadan a dasig iti pagilian, iti nailian-demokratiko a rebolusyon nga addaan sosyalista a perspektiba.

*(Paset daytoy ti paduyakyak ti Komiteng Tagapagpaganap ti Komiteng Rehiyon – Amianan a Daya a Luzon para iti panangselebrar iti maika-34 Anibersaryo ti Partido Komunista ti Pilipinas, Disyembre 26, 2002)*

# DAGITI NASKEN A PADUR-ASEN PAY

**SAAN PAY NAAN-ANAY TI PANANGIPURSIGI TAYO ITI REBOLUSYON AGRARYO. DAGITI SUMAGANAD KET DAGITI ADU PAY A KASAPULAN NGA IDUR-AS KEN ILINTEG A PAGKAPKAPUYAN KEN DAGITI NASKEN A PAGIGGEMAN.**

**IMULAT, ORGANISAEN KEN PATIGNAYEN TI MASA.** Daytoy ti kangrunaan a kayat tayo a magun-od iti panangirussuat ti agreb. Tapno maaddaan ti basaran ti pannakagun-od dagiti benepisyo. Ilinteg tayo ti panagkamakam iti benepisyo nga awan pay naidasar a gawaing masa. Saan nga ipasubo ti masa no saan pay nakasagana. Iti kastoy a pamuspusan, amin dagiti kalkalikaguman a benepisyo ket saan met laeng a magun-od.

**AGPAKALAING TAYO AMIN ITI PANAGIGGEM ITI AGREB KAS NAPATEG A TULBEK ITI AMIN-A-BENNEG A PANAGDUR-AS.** Agpakalaing no kasano tayo a pagsisisilpoen iti maymaysa a kumpas agturong iti maymaysa a direksyon dagiti trabaho nga edukasyon, propaganda, panagorganisa, panagpatignay, pannaki-alyansa, trabaho a militar ken pinansya.

Seryoso a pagadalan no kasano nga agsisinnuporta dagitoy tapno iti kabuklan na ket mapataud ti linya ti Demokratiko a Rebolusyon ti Umili (DRU) nga ita ket adda pay laeng iti tukad minimum nga agreb.

**PADUR-ASEN TAYO TI PANAGPLANO A SISTEMATIKO KEN DETALYADO A NAKABASAR ITI BUKOD A PIGSA KEN KABAELEN.** Adun ti kapadasan tayo a nasayang dagiti panagpursigi, gagar ken panawen gapu iti kinalukay ti panagplano ken kinakurang ti balabala ti panagtignay.

Saan a basta amin ket ipabaklay lattan ti taray ti laban kadagiti lider masa ken aktibista. Nasken nga ikeddeng, tarabayan ken kuyogen ti annatup a komite ti Partido dagiti organisasyon masa iti panagplano agingga iti panangipatungpal kadagiti nagkaykaysaan. Kakuyog iti panangbukel kadagiti annatup a kiddaw iti tunggal laban, iti tunggal lugar ken panawen; ken iti panagamiris iti kalintegan dagiti panawagan.

**IKAMAKAM TAYO TI EDUKASYON TI MASA, LALLALO ITI PANANGIPASAKNAP TI LINYA NGA ANTIPYUDAL.** Adu kadagiti pagtigtignayan a lugar a saan a nalawag ti linya tayo. Kasapulnan nga armas dagiti pwersa iti linya nga anti-pyudal. Agadal kadagiti basaran a dokumento. Kas ti Espesyal a Kursu ti Tignayan a Mannalon,





Rebolusyonaryo a Tarabay iti Reporma iti Daga, ken Kurso iti Gimong ken Rebolusyon a Pilipino.

Nasken nga ingato pay ti kaammoan ti masa mainaig iti risiris dagiti dasig. Iti mananggundaway a galad ti estado dagiti apo't daga ken burgesya kumprador. Iti

■ kinabannuar ti masa. Iti kasiguradoan ti balligi ti rebolusyon. Ken ti pakasapulan ti sosyalista a rebolusyon kalpasan ti nailian demokratiko a rebolusyon. ■ Ti edukasyon ken organisasyon ti natibker a pundasyon iti nainballigian a panagtignay. Maisagana na pay ti masa iti posible a reaksyon ti kabusor ken ti nangatngato a direksyon ti panagtignay.

■ Saan nga umanay nga agsanggir laeng iti ispontanyo a regta ti masa. Kadagiti lugar nga awan pay dagiti nailanad a rekisito, ikamakam ken sangoen a dagus ti edukasyon ti masa tapno maaddaan da ti tibker a lumaban. Liklikan ti adbenturismo. Pagbantayan met ti nabuntog a trabaho iti edukasyon ken panagorganisa a saan a nakatalmeg iti panagpatignay. Daytoy ket konserbatismo.

■ **NASKEN A BUKLEN TI PLATAPORMA DAGITI GRUPO A PANG-ORGANISA KEN GRUPO TI MANNALON (GP-GM)** a kangrunaan nga agrikrikos ken mangidaulo iti panaglaban iti anti-pyudal ken malapyudal a pananggundaway.

■ Iti tukad (GP-GM) mabalinen nga ipatungpal ti sumaganad: organisado a panagsubmarino, sistema ti pabulnos, sistema ti patangdan, panangurnos ti patakaran iti patrabaho iti ammoyoan, panangammo kadagiti daga a saan a

masuksukay; panangilukat ken panangpadur-as kadagitoy, liklikan ti risiris iti baet dagiti masa, agabang no kasapulan; panangingato ti produktibidad. Padur-asen dagiti uma, bangkag, talon wenno payaw no paborable ti kadagaan.

Mabalin a maitandudo a pagsayaatan ti masa ti kinaadda ti komunal a proyekto, no siguden nga adda nairut a panagkaykaysa ti masa.

**ITI TUKAD KP, IRUSSUAT TI PANANGIBABA TI ABANG ITI DAGA, PANANGIBABA TI USURA, PANANGIBABA TI MOLINO, PANANGIBABA TI ABANG ITI MAKINARYA KEN IRIGASYON.** Ti kumprontasyon dagiti mannalon iti apo't daga ket nasken nga iti tukad KP.

Pasayaaten ken paunegen ti kaamoan tayo iti panangingato ti produktibidad ti agrikultura. Ammoen no kasano a marisut uray dagiti parikut mainaig iti panaglaban iti naduma-duma a peste. Panagusar ti organiko nga abono ken pestisidyo. Panagpadur-as ti panagmula. Panagaramid ken panangtarawidwid ti irigasyon. Panagpadur-as ti ramit iti produksyon.

**PAGIGGEMAN TI TRABAHO ITI KAAW-AWAYAN NGA UMANNAMONG ITI PRENTE NGA ANTIPYUDAL.** Agsanggir iti basaran a masa a mannalon. Awisen dagiti akintengnga a mannalon. Inyutralisa agingga't maawis dagiti nabaknang a mannalon. Gundawayan dagiti risiris iti baet dagiti apo't daga babaen ti panagduduma iti patakaran iti nalawlawagan nga apo't daga tapno maisina ken pagbalinen a kangrunaan a target dagiti dadakkel, adda iti poder ken despotiko nga apo't daga.

**MAKI-ALYANSA KADAGITI PETIBURGESYA ITI ILI KEN SYUDAD.** Alaen ti suporta da iti tignayan nga antipyudal, antipasista ken anti-imperyalista.

**PAGIGGEMAN TI PAPEL TI NAPARANG A TIGNAYAN MASA.** Maisilsilpo, maorganisar ken mapatignay ti nalawa a bilang ti umili gapu kadagitoy. Nasamay a wagas dagitoy a pangibulgar ken panglaban kadagiti mananggundaway ken manangikuspil nga addangen dagiti imperyalista ken agar-ari a dasig. Nalawa a bilang ti umili ti maabot ken maawis ti rebolusyunaryo a tignayan iti dalan ti nailian demokratiko a rebolusyon.

**PADUR-ASEN TI TRABAHO A PROPAGANDA KEN KULTURA.** Dagdagus nga ipaduyakyak tayo dagiti panagtignay saan laeng kadagiti sona no di agingga kadagiti syudad ken sentro nga ili.

Iyaramidan tayo ti kanta, drama, daniw, istorya ken drowing ti kasasaad, pannakidangadang ken dagiti balligi ti umili. Itakder dagiti grupo a pangkultura. Regular a mangirussuat kadagiti panagsanay.

Ibulgar ken kondenaren dagiti ubbaw a linteg ti reporma iti daga ti reaksyunaryo nga estado a saan a mangbigbig iti kalintegan dagiti mannalon nga agtagikua ti daga nangruna ti CARP. Ken dagiti manangallilaw ken manangagum a proyekto nga ISF, IFMA, CADC, CBFM ken dadduma pay.

Suportaran tayo dagiti rebolusyonaryo a pagiwarnak tayo. Babaen ti panagbayad kadagiti subskripsyon. Padur-asen pay ti sistema ti koresponsal ken pidbak. Urnoson ti taray ti distribusyon dagiti babasaen tayo.

**IMAKSIMISA KEN PALATAKEN TAYO TI MILITANSYA TI PANAGTIGNAY TI MASA.** Ilinteg tayo ti “kanigid” a kamali nga alaen ti hukbo ti inisyatiba ken saanen a patignayen ti masa. Kanawan a kamali met maud-udi ti Hukbo idinto a tumigtignayen ti masamasa. Dusaen basar iti dagsen ti krimen dagiti napeklan a kontra-rebolusyonaryo a

mangdidigra iti tignayan ti masa.

**PADAKKELEN TI BILANG DAGITI AKTIBISTA.** Daytoy ti minimum a panangrukod tayo iti panagapit iti balligi ti tignayan nga antipyudal. Ipursigi ti panangpadakkel ti rebolusyonaryo a puersa. Estratehiko ken dagus a pakasapulan ti kinapateg daytoy. Saan a maab-abbatan nga ubbog ti regta ti masa. Gapu ta interes da ti itantandudo tayo. Ilarga tayo ti inisyatiba, regta ken determinasyon ti masa. Partuaten tayo ti rinibu a bilang manipud kadakuada a mangbaklay iti demokratiko a rebolusyon ti umili.

**APITEN DAGITI BALLIGI.** Saan pay a naan-anay ti panagapit tayo kadagiti balligi. Apiten tayo babaen iti panangingato ti kamulatan ken organisasyon ti masa. Iti trabaho a pinansya, suporta a tao ken materyal para iti NPA. Iti panagpalawa pay ti pagtigtignayan. Iti panagpaadu pay ti puersa. Iti panangitakder kadagiti Ganap a Samahan Masa kadagiti lugar nga adda basaran nga itakderen. Iti panangrekruta iti Hukbo. Panagbukel kadagiti sanga ti Partido iti lokalidad. Iti panangbukel ti Demokratiko a Gubyrno ti Umili iti tukad baryo.

**ITI PANNAKAIBUELO TAYO ITI AGREB, PUMARPARTAK KEN RUMEGREGTA TI REBOLUSYONARYO A TRABAHO - TI PANANGITAKDER TI PARTIDO, ARMADO A PANNAKIDANGADANG, REBOLUSYONARYO A TIGNAYAN MASA KEN PANNAKIALYANSA.**







# TERORISMO TI ESTADO

Naranggas. Narungsot. Brutal. Daytoy ti kayat a sawen ti 'Strong Republic' ti rehimen ti US- Macapagal-Arroyo.

**L**ti nabiit pay laeng a panagtugaw ni Gloria Macapagal-Arroyo, napartak a napunas ti aniaman a maskara wenno pammarang a makaili ken makatao daytoy.

Kumarkaro ti kinarigat. Awan ti trabaho. Awan ti masukay a daga. Saan a

makatalna ti umili.

Nainkalintegang dagiti kiddaw ti umili. Karbengan iti panagtagikua iti suksukayen a daga. Seguridad iti trabaho ken panangingato ti sueldo. Edukasyon, pagindegan, salun-at ken dadduma pay a serbisyo. Ngem ti sungbat ni GMA ket nakaro a kinaranggas. Ti panagusar ti ima a landok. 'Strong Republic.'

Gandat na a patalnaen amin a panagsuppiat ken panaglaban. Target na dagiti amin a progresibo ken rebolusyonaryo a puersa.

Iladladawan ti sumaganad a pangpagilian a datos ti kumarkaro a didigra nga impaay ni GMA iti karbengan a kas tao manipud January 22, 2001 agingga't Oktubre 31, 2002.

- ❑ 9,206 ti biktima ti panagbomba ken awan pilien a panagpaputok
- ❑ 18,695 ken nasursurok pay ti biktima ti harassment
- ❑ 851 biktima ti iligal a panagaresto ken detensyon
- ❑ 105 biktima ti tortyur
- ❑ 24 ti dinukot – maysa ti nabirukan a natayen (Warly Nagasao iti Echague); dua ti nagbalinen a tiktik; 6 ti nabirukan a dimmalan iti nakaro a tortyur (karaman ditoy ni Dante Bitagon iti Bagga); 15 ti saan pay a nabirukan.

- ❑ 4 nga insidente ti puersado a panagpabakwit ti mapaspasamak kada lawas. (84 ti nairekord iti uneg ti 20 a bulan).

Panpaneknekan dagitoy datos ti kinaubbaw dagiti deklarasyon ti pannakagun-od ti kappia ken talna babaen ti 'Strong Republic'.

Karkulado ken planado ti panagusar ti terorismo a makadidigra kadagiti sibilyan ken sanikua. Kangrunaan a panggep daytoy nga ipasaknap ti buteng kadagiti umili. Tapno kontrolen ti pannirigan ken lipiten ti panagtignay da. Rebbeken amin dagiti militante nga organisasyon masa. Ken kontrolen dagiti komunidad.

Awan sarday a mairusrussuat ti dadakkel nga operasyon militar. Tapno siguradoen ti implementasyon dagiti proyekto a makadidigra iti interes ken pagimbagan ti umili. Kas ti Cassava plantation project ni Danding Cojuangco ken Gob. Dy iti Mallig Region. Coal mining ken coal-fired power plant ni Gob. Dy iti Cauayan, Naguilian ken Benito Soliven. Panagtroso dagiti dadakkel a pulitiko ken kapitalista iti Sierra Madre. Ken dadduma pay.

Ti *all-out war* ni GMA ket nairut a kasilpo ti panagrebba ti *peace talks* iti baet ti GRP ken NDFP. Adda pakainaigan na iti deklarasyon ti US ken European Union a terorista ti CPP-NPA-NDF ken ni Jose Maria Sison.

Kasilpo met daytoy ti pannakibiang ti tropa ti Amerika iti pannakigubat kadagiti rebolusyonaryo a puersa kas ti NPA ken MILF. Agtultuloy nga agtipon nga ehersisyo-militar ti US ken RP. Ken ti baro a katulagan militar iti baet ti US ken Pilipinas a Mutual Logistics Support Agreement (MLSA).

Ipilpilit ita ni GMA ti *Anti-terrorism bill* a nakarkaro pay ngem Martial Law. Biagen manen ti *National ID System* tapno pairuten ti



panangsiput ken pannakibiang iti pribado a panagbiag ti umili.

Pinabaro ti Oplan Makabayan. Ninaganan nga Oplan Gordian Knot. Awan nagdumaan daytoy iti naglabas a kontra-insurhensya a programa da Marcos, Aquino ken Ramos.

Manayonan ti pueras ti AFP. Mabukel ti ad-adu pay a CAFGU. Target uray dagiti babbai ken kabataan. Maarmasan dagiti barangay tanod. Mabukel manen dagiti grupo a vigilante. Barrio Intelligence Network (BIN). Ken secret marshalls ti PNP.

Napadasanen ti Martial Law. No sadino ket awan pulos mabigbig a karbengan a kas tao. Saan tayo nga ipalubos a maitinnag manen daytoy babaen ti Anti-Terrorism Bill. National ID system. Oplan Gordian Knot. All-out war. Wenno aniaman a pasista nga instrumento ti pananglipit ken panagranggas iti umili.

Irussuat tayo dagiti dangadang nga antipasista. Buklen ti nalawa a prente a kontra-pasismo ti estado. Nairut nga isilpo daytoy kadagiti dangadang nga antipyudal ken antipasista. Ibulgar ti didigra ti militarisasyon iti kaaw-awayan. Dagiti kinadangkog dagiti tropa ti AFP, PNP ken CAFGU. Ilawag ti kaipapanan ti Linteg Kontra-terorismo.

Irussuat dagiti panagadal iti karbengan ti umili. Dagiti basaran a karbengan a kas tao a nailanad iti *Dagiti annuroten iti panangitakder ti Gubyerno ti Umili. Ti Komprehensibo a Katulagan iti Panangrespeto ti Karbengan kas Tao ken Internasyonal a Makatao a Linteg.*

Pagrebengan ti Hukbong Bayan a pagiggeman, ipasaknap ken ipalawag ti *Tres Otso a Disiplina ti NPA* iti intar ti Hukbong Bayan ken iti umili. Kasta met dagiti annuroten iti rebolusyonaryo a hustisya.

Suportaran ti tungtongan a kappia a nakabasar kadagiti nagkaykaysaanen a katulagan. A nakabasar iti prinsipyo ti independensya, soberanya ken panagrespetar iti agsinnumbangir. Irupir ti pormal a tungtongan, saan a *"back-channeling"* (saan a pormal a pannakitungtong).


Iti sango ti kumarkaro a kasasaad iti karbengan a kas tao ken umir-irteng a pananglipit a politikal, lallalo a maidur-duron ti umili a militante nga agtignay. Ken arakupen ti nangatngato a langa ti panagtignay, ti armado a dangadang.

Kas dagiti naglabas a pasista a patakaran, awan sabali a kaipapanan ti "Strong Republic" ni GMA no di pannakapaay.

## ANTI-TERORISMO A GANNUAT

(Anti-Terrorism Bill)

Saan a makuntento ti rehimen US-Arroyo kadagiti ipaay na a kinaranggas iti umili. Iti Konggreso, inkeddeng na a prayoridad a linteg ti Anti-Terrorism Bill.



Daytoy a linteg no maipasa ket paatiddogen na ti sakop ti panagaresto ken panagrekisa nga awan mandamiento kadagiti tao nga "umakto a naidumduma." Palawaen na ti *warrantless arrests* laban kadagiti umili a pagduduaan a nagbasol ti krimen a politikal kas ti rebelyon ken sedisyon.

Uray awan ti deklarasyon ti Martial Law, mabalinen dagiti sumaganad:

- maidarum ti kaso kas kumon a krimen uray no ti basol ket politikal ti galad na
- agrekisa uray no awan ti mandamiento na
- mapaatiddog ti panawen ti pannakadetina nga awan darum a kaso. Tapno gundawayan da ti panawen ti kustodial nga imbestigasyon (bayat a nakabalud) wenno ti makunkuna a taktikal nga interrogasyon
- agirussuat ti nagaraw (mobile), awan pilpilienna (random) ken nakapirmi (stationary) a tsekpoynt dagiti pulis ken militar
- agirussuat ti awan pilpilienna (indiscriminate) ken nasaknap a panagsona lallalo kadagiti komunidad iti urban tapno maparuar dagiti kriminal

Kas iti Martial Law ni Marcos, mausar dagitoy kadagiti lider masa ken kadagiti kameng dagiti militante nga organisasyon ti umili a lumablabaan iti malunglungso, nakunniber, kontra-umili ken militarista a patakaran ti rehimen a US-Macapagal-Arroyo.



## Panangikuskuspil kadagiti karbengan kas tao

Iti kaaw-awayan man wenno iti syudad, target ti kumarkaro a ranggas militar ken panagliplipit dagiti lider mannalon, aktibista a masa, tao ti simbaan, propesyonal ken uray dagiti saan nga organisado a masa.

**I**ti rehiyon ti Cagayan Valley, nalatak a kaso ti ranggas ti estado ti panagdukot ken panagsalbeyds kenni Warly Nagasao, coordinator ti Bayan-Muna iti Echague. Ti panagdukot ken panagtortyur kenni Dante Bitagon, lider mannalon ti Baggao.

Ken ti kriminalisasyon ti kaso nga agraryo kas ti pannakaibalud ti 7 a lider mannalon ti Caquilingan Farmers Association ti Cordon. Pinagsuspetsaan da a nagpuor iti sumagmamano a puon ti mangga ti pamilya Roque ken Villaluz.

Kadagiti sentro nga ili ken syudad, nairut a masipsiputan ti garaw ken tignay dagiti kameng ti progresibo nga organisasyon.

Pinangtaan dagiti elemento ti 41st IB a saan da pagturposen iti hayskul dagiti kameng ti Anakbayan iti Baggao. Inobligada a mangala ti clearance iti kampo militar.

Liplipiten da dagiti aktibista iti Cagayan State University ken dadduma pay nga iskuelaan.

Illegal nga inaresto ti PNP-Cauayan ti walo a kabataan ti Anakbayan a nangirussuat ti tignay protesta kadaytoy bulan ti Oktubre.

Sinampaan da ti kaso dagiti empleyado dagiti ospital ti Isabela a nagprotesta tapno labanan ti panagserra dagiti ospital. Sinuspinde dagiti dimmaray nge empleyado ti San Mariano Medicare and Community Hospital ken San Antonio Municipal Hospital (iti San Antonio Ilagan) gapu kano ta saan da a

nangala ti pammalubos nga agrali iti kapitolyo tapno labanan ti panangpaserra iti 10 nga ospital iti Isabela.

### **Ranggas-militar iti Hacienda Sta. Isabel**

Uray dagiti saan a kameng ti progresibo nga organisasyon ket saan a makaliklik iti ranggas militar.

Iti nakaro a kinaranggas, maysa a taw-an ti perya ken maysa a mannalon iti Hacienda Sta. Isabel ti pinatay ti 77<sup>th</sup> IB nga idadauloan ni Lt. Richie Mabalod idi Mayo. Binugbog da ti tallo pay a taw-an ti perya. Impaduyakyak a dagus ti 5<sup>th</sup> ID nga NPA kano dagiti pinatay da. Natakwatan met laeng a dagus a sibilyan dagiti biktima da.

Sakbay ti masaker, adun ti kaso ti pammutbuteng ken panagranggas kadagiti aktibo a lider mannalon a lumablabaan iti proyekto a cassava. Kas ti pasamak da Cito del Rosario, maysa a daulo ti Danggayan dagiti Mannalon iti Isabela (DAGAMI) ken dagiti kakadua na a lider masa iti Hacienda Sta. Isabel a ginandat a patayen dagiti ahente ti paniktik ti 502nd Brigade.

Idi Mayo, ginandat da pay a patayen ni Franklyn Bulibol, ngem asawa na ti napaltugan ken napatay. Lider masa ti Alyansa dagiti Mannalon Laban iti Cassava Plantation (ALMACA) ni Franklyn.

### **Pananglipit kadagiti Tao ti Simbaan**

Dagiti aktibo a taw-an ti simbaan ket agtultuloy a nakapadas ti surbeylans ken black propaganda. Nangruna da Obispo

Sergio Utleg ti Diosesis ti Ilagan, Sr. Mela Alvarez, ti RGS, ken dadduma pay a padi, madre ken empleyado ti Simbaan a Katoliko. Da Obispo Pandongan ti Episcopal Church of the Philippines, Obispo Wandag ti UCCP ken Pastor Joseph Agpaoa ti Iglesia Filipina Independiente ken dadduma pay.

Ti Education Forum ken Social Action Center ti Diosesis ti Ilagan ket sinerrek dagiti elemento ti paniktik ti AFP. Tinakaw da dagiti ramit opisina kas ti TV, VHS, kompyuter, ken napapateg a dokumento mainaig iti cassava plantation project ni Cojuangco-Dy, ti coal mines/ coal plant, petisyon laban iti foreclosure dagiti hacienda iti Isabela, dagiti kaso ti panaglabsing iti karbengan kas tao, direktoryo dagiti alyado nga organisasyon ken dadduma pay.

Napasamak dagitoy iti panawen a nagdeklara ti Gobernador ti Isabela ti all-out war laban kadagiti NPA ken dagiti militante nga organisasyon a sumupsuppiat kadagiti proyekto na.

Nagdeklara met ti Bise-Gobernador ti Isabela, Santiago Respicio, nga *"If I were General Alvarado, I will kill all of them!"* (No siak ni Gen. Alvarado, patayek amin ida!).

Kinondenar ti umili daytoy taktakderan dagiti daulo ti probinsya ti Isabela.

Umir-irteng ti dangadang ti umili. Saan laeng ti panangirupir iti karbengan a kas tao ken panaglaban iti pasismo, no di maipingpinget met ti dangadang nga anti-pyudal ken anti-imperyalista. **B**

## Didigra ti CAFGU iti Quirino

Iti probinsya ti Quirino, saanen a mabilang ti didigra nga impaay dagiti elemento ti CAFGU. Karaman dagiti daulo da a tropa ti 54th IB PA. Adu kadakuada ti sigud a lumpen ken maton iti baryo. Ita ket kasla da agmauyong nga aso. Umat-atiddogen ti reklamo ti umili.



**K**immaro ti anti-sosyal nga aktibidad. Napukaw ti kinatalna.

Immadu ti panagtakaw kadagiti taraken nga ayup. Masansan ti panagbabartek ken panangrribuk. Kanayon nga agkumkumando da kadagiti pagindegan ti masa uray iti rabii.

Irekreklamo ti umili ti panagbase da iti abay ti eskuelaan ti ubbing.

Masansan pay nga agholdap da ken agpammarang da kas NPA. Ngem ammo met laeng ti masa a CAFGU ti akin-aramid.

Iti sadino man a baryo, parparitan da dagiti mannalon a nasapa a mapan iti pagbangkagan ken pagumaan da.

Nangitinnag da ti curfew. Alas nuebe iti rabii agingga alas kuatro iti parbangon.

Piliten da dagiti kabataan nga ag-CAFGU. Iti Maddela, pilpiliten da dagiti kabataan nga ikuyog a trensera da no adda operasyon. Wenno uray no agdigos da. Amangan kano no biraen ida ti NPA.

No agop-operasyon dagiti CAFGU ken Army, igidgiddan da ti panagtakaw. Masansan ti panagpapatok ti paltog kas pamutbuteng.

Indeklara da a masapul kano nga "agpadalus" dagiti bumaryo tapno saan a mapagduduaan nga NPA wenno sumupsuporta ditoy. Pinasapata da dagiti sibilyan ken pinaruar da a surrenderi.

Nagbalin payen a tagabo ti CAFGU dagiti opisyaales ti baryo. Parakayo. Parabunag. Ken paraluto.

Iti Nagtipunan, nakaro a lablabsingen da dagiti karbengan dagiti nailian a minorya nga Aggay. Serserken da dagiti pagnanaedan dagiti Aggay uray no awan pammalubos. Agtakaw da pay ti ramit ti produksyon kas ti arado, chainsaw ken paragus.

Iti Tilitilan, pinatay da itay Oktubre ni Edward Damangen kalpasan ti adun a gandat a patayen isuna iti bansuan na.

Iti Ysmael, pinatay da idi Oktubre ti maysa a buyer ti saba, ni Mr. Respicio, kalpasan a hinoldap da ti iggem na a kuarta. **B**

## Dagiti panaglabsing ti 77th IB iti Zinundungan

Iti ulat-koresponsal ni Ka Crispin Apolinario, tagapagsarita ti NPA-Danilo Ben Command, inyulat na dagiti sumaganad a paspasamak iti umili ti Zinundungan Valley iti bulan kadagiti Hulyo ken Agosto.

- Siniripan ken ginandat a ramesen ti maysa nga elemento ti 77th IB ni Helen Laguna, titser ti Day Care Center iti Masi, Rizal. Nagreklamo ni Laguna iti konseho ti barangay ken iti CO ti 77th iti Tarming Gagabutan. Inyakar da laeng ti abusado a soldado.
- Binugbog da ni Danny Asco ken Vino Laguna, opisyaales ti baryo ti Masi nga awan gaggapu na. Ni Asco ket kagawad ti barangay. Ni Laguna ket maysa a tanod ti barangay.
- Binugbog da ni Ferdinand ken Raxon Balisi, agpada a minorya nga Aggay. Pinagsuspetsaan a binaon ida ti NPA a gumatang iti tiendaan.
- Tiniliw ken inenteroga da ni Nicasio Artipicio, Anita ken Benny Bungag. Pinangtaan ida a saan nga agpasangbay ti NPA.
- Nangpartuat ti riribuk iti baet dagiti agkakaarruba kas ti pasamak da Denna ken Edwin Lanna.
- Linabsing da ti linteg mainaig iti pannakigubat iti panagkampo da kadagiti balay ken iti abay ti iskuelaan ti elementarya.
- Awanen ti maiwaras ti midwife nga agas iti Zinundungan Valley gapu ta innalan dagiti soldado ti agas.
- Agingga ita ket ipilpilit da ti panagpa-CAFGU numan pay tallo a daras a sinuppiat dagiti taga-Zinundungan Valley daytoy.
- Panangipasaknap ti panagbabartek ken panagsugal. **B**



## Panagabusu ti tropa ti AFP iti Bitag Grande

Kalpasan ti labanan iti baet ti NPA ken AFP idi Oktubre 29 -Nobyembre 1, 2002, iti Bitag Grande, Baggao, lallalo a pinakaro ti tropa ti 5th ID ti kinadangkod da iti umili. Inyulat ti umili a mannalon ti panagirut ti kasasad da. Impadanon da iti lokal a masmidya dagiti sagsagrapien da a panangliplipit kadagiti demokratiko a karbengan da. Kas ti sumaganad:

Nangitinnag ti curfew a mangrugi iti alas nuebe iti rabii agingga alas kuatro iti parbangon (9 pm - 4 am). Maipatungpal daytoy iti 7 a sityo ti baryo. Dagiti aglabsing ket mapukisan ti buok da. Laksid pay iti nakaro a pammutbuteng kadakuada.

Dua a lawas a naparitan a mapan iti uma ken bangkag da dagiti mannalon.

Nangi-isyu ti AFP ti "safe conduct" passes kadagiti agubra iti bangkag ken uma. Makontrol ti balonen da a makan.

Maiparit ti panagusar ti flaslayt iti rabii Pinagbalin a baraks ti siyam a katao nga iskwad ti 41st IB ti balay ti maysa a barangay tanod.

Agreklamo dagiti umili iti pilit a panagrekisa kadagiti balbalay da nga awan mandamiento ken awan permiso ti akinbalay.

Piliten ti tropa ti army a nakabaraks iti baryo a baliwan ti nagan ti asosasyon ti babbai manipud iti "alliance" agturong iti "Cooperative." **B**



# Nabara ken nadungngo a panagkakaddua

Maysa nga agtaltalinaed a pagrebbengan dagiti rebolusyonaryo a pairuten ti nadayaw unay a naindasigan a panagkaykaysa ken panagpipinnateg. Saan a mapunas a galad dagiti rebolusyonaryo. Kadaytoy nga artikulo ti, mailanad ti kapadasan ni Ka Tonyo, maysa a petiburges a nagkameng iti New People's Army.



“Andong, ania’t napampanunot mo’t nagkameng ka’d ta? Kitaem man, kasla saan na kami payen a malaglagipen? Insukatnakamin kadagiti kakadduam a saan mo pay kadara ken saan mo pay nga am-ammo?” ti agpapauyo ken napnoan danag a saludsod ni Nanang ko kaniak idi naminsan a bimmisitaak kadakuada. Gagangay a rikna ti saan pay a mulat nga ina.

Nanaynayonan pay ti danag gapu iti nadumaduma a saywar ti kabusor a mabuybuya iti TV ken mangngegan iti radio. Adu ngamin dagiti maipadpadamag a pamadpadakes ken pamarpardaya mainaig iti CPP-NPA-NDF. Terorista da kano. Nasinasinan daytoy nga organisasyon. Adda maka-Joma. Adda kontra-Joma. Ania’t kinapudno?

“Awan pulos kinapudno na dagita. Saywar amin dagita ti kabusor gapu ta madanagan la

unay iti panagregta manen ti rebolusyonaryo a tignayan. Maysa pay, solido ken natibker ti panagkaykaysa mi. Saan a mapasamak dagita madamdagay,” impalawag ko.

Iti makalawas a kinaaddak iti balay mi, inkarigatak nga inlawlawag kenkuana ti taktakderak ken pannirigak. Ken no ania ti nastrek ko a nangiserbiak ti ad-adu a panawen ko ngem kadakuada.

“Saan ka insukat, Nanang. Limmawa laeng ti pagserserbiak. Saan a para iti bukod ko ti pampanunotek no di ti interes ti nalawlawag pay nga umili.”

“Kasla saan a nakappapati!” kinuna na. “Saan mo pay malabaan idi ti brief mo! Itatta, pagilian ti kayat mo a pagserserbian?” dillaw na kaniak.

Ni Nanang talaga. Saan a mamati nga iti kinaaddak iti intar ket nakapagmuliak iti bukod ko a bagi.

## Nabara a panaglilinnangen

Ti pakadanagan na la unay, “kasano ngarud ti biag mo itan? Kasano ngay no agsakit ka? Awan mangtulong kenkan,” saludsod na.

“Ayna Nanang, mas nalablabes pay ngem iti agkakapamilya no kasanodak nga ipatpateg dagiti kakadduak!”

Impalawag ko a managayat ken nadungngo dagiti kakaddua. Naisangsangayan unay iti panagkakaddua dagiti rebolusyonaryo.

“Saan kayo nga agiinnammo, kasano a mapasamak dayta ibagbagam!” karit na.

“Maymaysa ti tarigagay ken panggep mi. Agserbi iti umili. Adda no kua dagiti panagsisinnupadi ti ideya. Ngem iti kabuklan na, naringbaw latta ti panagkaykaysa ken nasayaat a panaglilinnangen,” innayon ko.

Lallalo a nagtalek ni Nanang ko idi inlawag ko no kasano nga

agtitinnulong dagiti agkakaddua iti intar.

“Nanang, saan ka a madanagan. Managtulong dagiti kakaddua. No aniaman dagiti saan ko kabaelan, maawatan da daydiay. Sisagana da a tumulong kaniak. Adda met dagiti kabaalak a sisaganaak a mangibingay kadakuada. Agpipinnateg kami. Nagsisingpet, nagaget ken mannakaawatda,” pammaneknek ko.

Marka dagiti rebolusyonaryo ti panagtittinnulong ken panagsisinnuporta. Iti tengnga ti talna man wenno riribuk. Iti nam-ay man wenno rigat. Liday man wenno ragsak.

Malaksid iti panagiggem ken panagtittinnulong kadagiti pagrebbengan, paset pay ti biag dagiti rebolusyonaryo ti panangasikaso iti panangsolbarda kadagiti problema ti pada a kakaddua. Iti panagtignay man wenno personal a problema.

#### **Nairut a panagkaykaysa**

Nasken nga ipursigi ti tunggal maysa a makatulong iti panangbukel ti panagkaykaysa.

Kasapulan ti panagkaykaysa tapno mabukel dagiti desisyon. Maipatungpal dagiti pagrebbengan. Maingato ti moral ti puersa ken masa.

Makapababa ti moral ti puersa no makitkita a saan nga agkakatonosan dagiti kakaddua. No saan a makita kadakuada ti panagpipinnateg ken nabara a panaglilinnangen.

Kadagiti dokumento ken pagannurutan ti BHB ken Partido, mailanlanad dagiti patakaran mainaig iti rumbeng a garaw ken tignay dagiti rebolusyonaryo a puersa, dagiti kolektibo ken dagiti indibidual.

Iti **Pagannurutan ti Bagong Hukbong Bayan**, nailanad dagitoy nga annuroten mainaig iti panaglilinnangen ken panangpadur-as ti relasyon ken umno a iti intar:

- Pagrebbengan ti Partido a siguraduen ti panangpadur-as ti kasayaatan a relasyon ti Hukbo ken dagiti umili, dagiti daulo ken mandirigma, ken ti Hukbo ken dagiti lokal a komite ti Partido (*Punto 4, Umuna nga Annuruten, Ti Bagong Hukbong Bayan ken ti Partido Komunista ng Pilipinas*)

- Dagiti daulo ket nairut a maiparit nga agusar kadagiti burges ken pyudal a galad iti pannakilangen da kadagiti kameng ken iti umili. (*Punto 4, Maikapap nga Annuruten, Disiplina*)

Iti **Basaran a Kurso ti Partido**, nailanad ken nailawag pay dagiti nasken a galad ti maysa a rebolusyonaryo:

- Naimpapussuan nga agserbi iti masa ken kanayun a naasideg kadakuada

- Kanayon a nakasagana ken saan a mabuteng iti sakripisyo ken patay

- Seryoso, naurnos ken nagaget iti panagadal ken panangipatungpal kadagiti pagrebbengan

- Mannakikaykaysa ken nabara iti pannakilinnangen iti pada a rebolusyonaryo

- Silulukat iti panangawat kadagiti dillaw ken nakasagana nga agilinteg kadagiti biddut ken kamali ken

- Internasyunalista Ti pannakikaykaysa iti

nalawa a mayorya dagiti kadre ken kameng ti Partido ket makita iti sumaganad:

- nabara ken nainkadduan a panagtrato iti amin a kaddua

- kinamanagtulong ken manangipateg

- panagtulong iti kaddua tapno maingato ti tukad ti kamulatan, kaammoan ken kabaelan

- umno a pannakilangen ken pannakikaykaysa kadagiti kakaddua nga addaan sabali a pannirigan, wenno iti relatibo a maud-udi. Wenno addaan nagbiddutan wenno kamali

- natibker a panagkaykaysa a nakabasar iti Marxismo-Leninismo-Maoismo, umno a linya ken patakaran

No awan dagitoy, mapukaw ti basaran ti panagkaykaysa. Tumaud ti riribuk ken mapukaw met ti disiplina. Saan a maipatungpal dagiti pagrebbengan. Mapukaw ti bileg ken pigsas.

Ti liberalismo ti maysa a dakkel a mangdadael iti rebolusyonaryo a panagkaykaysa ken mapagkaddua a panaglilinnangen. Nasken a nairut a pagbantayan daytoy.

Makitkita daytoy iti saan nga umno ken iresponsable a panagdillaw. Panagdillaw iti likudan. Saan a panagbigbig iti kolektibo a nagkaykaysa ken panagbiag. Panagatake a personal. Panagbirok ti riri. Panagpungtot wenno pannakiapa Awan ti panangipateg iti kakaddua. Liberal wenno saan a napudno iti bukod a bagi.

Kamulatan daytoy ti petiburges a panagbukbukod. Awanan panangipateg iti pagimbagan ti sibubukel nga organisasyon no di ti bukod na laeng. Kanniwas daytoy iti prinsipyo ti Marxismo-Leninismo-Maoismo. Saan a makatulong daytoy. Saan a palubusan a maaddaan ti puesto daytoy iti sidong ti rebolusyon.

**Panangmuli iti bukod a bagi**

“Gapu ta ipatpateg ti panagkaykaysa ken ipangpangruna mi ti rebolusyon, dagiti nagdudumaan mi iti ugali, pannirigan ken aktitud ket sekundaryo a saritaan. Nalaka laeng a mapukaw ken masolbar dagiti saan a panagkikinnaawatan.” inlawlawag ko.

Iti rebolusyonaryo a tignayan, nadumaduma ti naggapuan dagiti kameng. Nadumaduma ti dasig. Lugar. Puli. Tukad a nagadalan. Kaammoan. Kabaellan. Aktitud. Isu a nadumaduma met ti tukad ti panagi-innannatup.

Saan a maliklikan ti siasinno man a rebolusyonayo a puersa nga awit-awit latta dagiti impluwensya ti agdama a bulok a gimong. Gimong a pagar-arian dagiti dasig a mananggundaway

ken manangidadanes.

Isu nga adda pay laeng basaran a tumaud dagiti daan a bulok nga ugali, aktitud ken galad. Agtultuloy nga adda latta impluwensiya ken no dadduma ket agsubli ti bulok a panunot a natawid iti bulok a gimong.

Pagrebengan ti tunggal rebolusyonaryo ti panangmuli iti bukod na a bagi. Tapno agbalin a napudno a rebolusyonaryo. Babaen iti aktibo a panagtignay. Mulat a panangringbaw kadagiti kamali a kapanunotan, ugali ken garaw.

Saan met a kasla kimat wenno dagus a mamuli ti bukod a bagi. Napaut ken narikut daytoy a proseso.

Ngem nasken a paringbawen ken suppiaten dagiti nabatbati nga impluwensya ti bulok a gimong. Pagiggeman iti panagpanunot ken panaggaraw a salakniban ken ipangpangruna ti pagsayaatan ti rebolusyon.

Ipauneg ti personal nga interes. Iti sadino man ken iti kaanoman, nasken a tumakder iti prinsipyo.

Saan a maupay a mangdillaw keng makidinnillaw iti amin a kamali a garaw ken aktitud. Tapno makonsolida ti kolektibo a panagbiag ken panagkaykaysa ti Partido ken ti masa.

**Pagrebengan ti tunggal rebolusyonaryo ti panangmuli iti bukod na a bagi. Tapno agbalin a napudno a rebolusyonaryo. Babaen iti aktibo a panagtignay. Mulat a panangringbaw kadagiti kamali a kapanunotan, ugali ken garaw.**

Umuna unay nga ipateg ti Partido ken ti masa sakbay ti sabali.

Iti kasta, mapasayaat ti rebolusyonaryo a panaglilinnangen ken panagipatungpal kadagiti pagrebengan. Lallalo a mapatibker ti determinasyon iti panangidur-as ti demokratiko a rebolusyon ti umili agingga iti balligi.

**Interes ti umili ti ipangruna**

“Pagpaayanna dayta itigtignay mo?” ti maysa a saan ko malipatan a saludsod ni Nanang kaniak.

“Para siasinno? Para iti umili. Amin a magungundawayan nga umili. Karaman kayo idiyen,” ti insungbat ko.

“Napudnoak a rebolusyonaryo. Ti panunot, pakinakem ken trabahok ket para iti basaran nga interes ti umili a Pilipino.”

Adu pay ti nagdiskusyonan mi. Awan ti saludsod wenno komentaryo na a saan ko a sinungbatan. Iti kaudianan, binigbig na a saanen nga agbaliw pay ti taktakderak. Ngimmato pay ti panagkita na kaniak.

“Agannad ka ngarud. Agtalekak a saan na ka baybay-an dagiti kakadduam. Bigbigek ti kinapudno ti panggep mo. Ti tarigagay mo ket tarigagay ko metten,” sanak inarakup.

Idiay ko a narikna a naawatanen ni Nanang ti taktakderak. Inspirasyon iti panagsublik kadagiti kadinnanggay ko a kakaddua. **B**



Panagsanay ti NPA iti river-crossing: panagkaykaysa ken koordinasyon



# Ti Pannakaperdi ti Monumento ni Marcos

Maysa a simboliko nga addang tapno ipalagip ti pannakapaay ken pagbaybay-a ti nagsasaruno a rehimen manipud Rehimen ni Aquino agingga ita iti panagsingir iti pamilya Marcos ken dagiti kroni na iti nakaro a didigra nga impaay da iti umili idi panawen ti diktadura



MONUMENTO TI ABSOLUTO A KINAAROGANTE KEN KINALASTOG

**N**aballigian a pinabettak ti maysa nga espesyal a yunit iti operasyon ti NPA-Chadli Molintas Command iti Abagatan a Laud a Luzon, ti monumento daydi diktador a ni Ferdinand Marcos idia Taloy Sur, Tuba, Benguet.

Naisayangkat ti panagperdi iti rebulto idi parbangon ti maika-29 ti Disyembre. Nabettak dagiti mata, agong ken dagiti lapayag ti rebulto.

Iti paduyakyak ni Ka Martin Montana, tagapagsarita ti NPA-Chadli Molintas Command, impablaak na a ti rebulto ket “monumento ti absoluto a kinaarogante ken kinalastog ti maysa a diktador” a nasken a mapunas iti lagip dagiti umili.

“Naiyablat kadatayo nga umili a Pilipino, 29 a tawen ti napalabasen. Maysa a gaddil iti daga nga ansestral a pagnanaedan dagiti umili nga Ibaloy. Maysa a nakabutbuteng a palagip kadagiti nakadakdakes a krimen da Marcos kadagiti umili. Maysa a makapasarua a banag a kasapulan a maikakat,” panangtalmeg ni Ka Martin.

Iti panagkablaaw ni Gregorio “Ka Roger” Rosal, tagapagsarita ti Partido

Komunista ti Pilipinas iti NPA-Chadli Molintas Command, imbaga na a naragsakan unay ti umili a Pilipino iti pannakaperdi ti rebulto.

Kinondenar ni Ka Roger ti agtultuloy a dominasyon dagiti utek ti linteg militar. Ti pannakapaay da a dusaen dagitoy kadagiti krimen laban iti umili. Ninaganan na iti partikular da Imelda Marcos, dagiti annak da a da Bongbong, Imee ken Irene, dagiti kroni a da Danding Cojuangco, Roberto Benedicto, Henry Disini ken dadduma pay a pulitiko ken dadakkel a kapitalista a komprador.

Imbaga pay ni Rosal a dagiti biktima ti panaglabsing iti karbengan a kas tao ket saan pay naikkan ti annatop a danyos perwisyos. Indeklara ni ni Rosal a ti rebolusyonaryo a tignayan laeng ti “pagpenderan ti umili a naikuskuspil ken pinarigatan ti diktadura ni Marcos”.

Tinalmegan ni Rosal nga agtaltalinaed nga “adda bileg” ti direktiba idi 1999 ti Komite Sentral ti PKP a nangikeddeng

iti NPA nga “arestoen, usigen ken dusaen dagiti kangrunaan a tagapatungpal ken nagbenepisyo iti linteg militar.”

Impangngarigan na ti kaso ni Rodolfo Aguinaldo, maysa a pusakal a koronel ti PC idi panawen ti diktadura, a dinusa ti NPA idi 2001. Kuna ni Rosal, “kas kenni Aguinaldo, kaanoman ken sadinoman, ti pamilya Marcos ken dagiti alipures da ket madanon a madanon ti rebolusyonaryo a hustisya”

“Narigat a tumbaen ti monumento ni Marcos. Kas karigat ti rebolusyonaryo a panangbalbaliw iti kagimongan agturong iti pudpudno a nailian a wayawaya ken demokrasya ti umili. Ngem uray dagiti “nabaked a republika” ket di-maliklikan a marippuog, gapu ta nakabatay iti narukop a pundasyon, iti panangidadanes, pananggundaway, ken pananglabsing iti hustisya. Awan ti makalapped iti bileg ti umili ken ti rebolusyon,” ti panangrikep ni Ka Martin Montana. **B**



Napudno nga agserserbi iti umili

## Suporta para kenni Ka Joma, lumawlaw

**S**aan nga awaten ti adu a bilang dagiti umili sken dagiti personalidad ti deklarasyon ti imperyalismo a US a terorista ni Jose Maria Sison (Ka Joma) ken ti CPP-NPA-NDF.

Ditoy Pilipinas, lumawlaw ken dumakdakkal ti bilang ti sumupsuporta kenni Ka Joma ken CPP-NPA-NDF.

Dagiti Obispo ti Simbaan a Romano Katoliko ken Protestante, maysa a senador ken ti bise-presidente ti Pilipinas ti sumagmamano laeng iti umat-atiddog a bilang dagiti personalidad a nangsuppiat iti deklarasyon ti US ken ti European Union (EU).

Itay Nobyembre, nagtataripnong iti University of the Philippines Asian Center dagiti sumupsuporta kenni Ka Joma. Saan a nakaanay ti lugar iti kinaadu ti dimmar-ay.

Nagsarita da Supreme Bishop Maximo Tomas Millamena ti Iglesia Filipina Independiente, Vic Ladlad ti Bayan Muna, UP President Dr. Francisco Nemenzo, Judge Romeo Capulong, Nanay Mameng Deunida ken Nelia Sancho, co-chair-person ti Committee to Defend the Rights of Sison. Pinasingkeda da ti naan-anay a panagsuporta iti maliplitpit a lider.

Nagpatulod ti naka-video a mensahe da Obispo Julio X. Labayen, OCD, sigud a dauilo ti Ecumenical Bishops Forum (EBF), ken Senadora Loren Legarda. Kasta met a naipabuya ti interbyu kenni Vice Pres. Teofisto Guingona ken House Speaker Jose de Venecia mainaig iti kinatao ni Ka Jose Maria Sison.

Iti paduyakyak ni Obispo Labayen, impanawagan na ti panaglukat manen ti tungtongan a kappia iti baet ti Gubyrno ti Republika ti Pilipinas ken National Democratic Front of the Philippines (NDFP). Kiniddaw na pay iti EU Council a dagus a maikkat ti CPP, New People's Army (NPA) ken Jose Maria Sison iti listaan da a “terorista.”

Kinuna met ni Senadora Legarda a “Saanak a mabain a mangibaga a nauneg ti panangrespetar ko kenni Jose Maria Sison. Kas ti

panangrespetar ko iti siasinnoman a Pilipino a mangitantandudo iti interes ti pagilian... ni Joma Sison ket nalatak kaniak kas tao a napudno nga agserserbi iti umili. Saanak nga agduadua nga iti masangoanan, ti naidumduma a pannirigan na ket saan a dakkel a lapped iti pannakagun-od ti kumon a solusyon kadagiti parikut ti pagilian tayo.”

## Pormal a tungtongan, saan a back-channeling – Ka Roger

“No pudno a kayat ni Macapagal-Arroyo ti makitungtong panggep ti kappia iti NDFP, nasken ken umuna nga addangen na nga isardeng ti awan-sarday ken naranggas nga *all-out war*, irespeto ken ipatungpal na dagiti naglabas a katulagan. Isardeng ti panangtagibassit iti negosasyon babaen ti panangisayangkat na ti back-channel talks (saan a pormal) ken agsubli iti pormal a panel-to-panel negotiations.”

Daytoy ti impablaak ni Gregorio “Ka Roger” Rosal, tagapagsarita ti Communist Party of the Philippines mainaig iti posible a pannakailukat manen ti tungtongan a kappia. Inrupir na pay nga isardengen ti gubyrno ni Arroyo nga awagan ti CPP-NPA-NDF kas “terorista.”

Impaduyakyak pay ni Ka Roger a “dagdagus a kasapulan nga ipatungpal ti Comprehensive Agreement on Respect for Human Rights and International Humanitarian Law. Daytoy ti katulagan a mangtulong a mangsalaknib iti umili manipud iti panagabuso lallalo iti sango ti agtultuloy a a naranggas nga *all-out war* a nangbiktima iti adu a sibilyan”.

“Iti paset dagiti rebolusyonaryo a puersa, naikeddeng kadagiti Nalabaga a gerilya a nasken a pagadalan ken ipatungpal dagiti probisyon ti CARHRIHL. Dagiti pagannurutan ti NPA ket umannatop iti CARHRIHL ken internasyonal ken makatao a linteg ken dagiti pagannurutan iti gyera.”

“Tapno produktibo ti tungtongan, nasken a bigbigen ni GMA a ti CPP/NPA/NDFP ket mangipinget ti lehitimo a rebolusyonaryo a programa nga itantandudo ti dakkel a paset ti umili a Pilipino,” innayon ni Ka Roger. **B**



# DAMDAMAG ITI CAGAYAN VALLEY

## Pateco, Naballigian a Dinusa ti NPA-RPC

**D**inusa ti NPA-Reynaldo Pinon Command ti PATECO, kadakkelan a kompanya ti logging nga addaan rinibu nga ektarya a konsesyon iti San Mariano, San Guillermo ken Dinapigue idi Disyembre 7.

Napuoran ti agarup 60 milyon a gatad ti makinarya. Nadadael ti 20 a logging truck, 2 a bulldoser, maysa a logport, maysa a dumptruck, maysa a birada ken maysa a 4 X 4 truck.

Sakbay a dinusa, impalawag ti NPA kadagiti mangmangged ti gapu ti aksyon. Timmulong dagiti dadduma a mangmangged. Amin dagiti mabalin pay a pagimbagan ket inwaras ti NPA iti masa.

Nasorpresa ti agbanbantay a maysa a kumpanya a tropa ti 7th ID, goons ken PNP. Sa da la nagreaksyon kalpasan ti sumagmamano nga aldaw. Uppat a platun ti AFP manipud iti 5th ID ken PNP-Isabela ti inusar a mangsurot kano iti NPA.

Ti panagatake ti NPA ket maikatlo ken kadakkelan a sinagrap ti kompanya kadaytoy a tawen. Umuna a dinusa ti NPA-Aurora ti Diapitan Resources Development Corporation (DRDC), mother company ti PATECO idi Nobyembre 15, gapu iti panagsabidong ti baybay ti Dilasag ken saan a panagbayad ti danyos ken buis.

Impaduyakyak ni Ka Vic Balligi, tagapagsarita ti NPA-Reynaldo Pinon Command, a dinusa da ti PATECO gapu iti nakaro a panagabuso na iti lawlaw ken ti pananggundaway na kadagiti mangmangged iti trosohan.

Nakaro ti pananggundaway ti trosohan kadagiti mangmangged. Nababa unay ti panagsueldo da. P60.00 kada cubic ft. Nadagsen dagiti patakaran ken kissayen da pay iti sueldo da no adda madadael a partes ti makinarya. Panagsuspinde ti 2 nga aldaw agingga pannakaikkat ti pannusa kadagiti nalag-an a pagbiddutan ti mangmangged.

Us-usaren pay ti PATECO dagiti mabaybayadan a soldado, CAFGU ken goons kas para bantay. Manipud pay dekada otsenta ket mangmangted daytoy ti tong iti 5th ID ken kadagiti nangangato nga opisyalas ti PNP ken kapitolyo iti Isabela. Dua a daras a dinusa ti NPA ti PATECO idi 1990. **B**

## Paniktik ti AFP iti San Mariano, dinusa

**D**inusa ti maysa a tim ti NPA - Reynaldo Piñon Command ni Nonoy Pinco, aktibo a paniktik ti 45<sup>th</sup> IB idi Oktubre 27 iti baryo ti San Pedro, San Mariano. Naballigian a nairussuat ti pannusa gapu iti nairut a tulong ti masa iti lugar.

Ni Nonoy Pinco, addaan asawa ken anak, agnanaed iti Sentro ti San Mariano, Isabela ket aktibo iti panagtiktik ken panangitakder ti Barrio Intelligence Network kadagiti baryo ti San Mariano.

Nagragsak ti umili iti pannakadusa ni Pinco. Naikkat ti maysa a lapped iti panagtignay da. **B**

# Operasyon Brigada ti 5th ID iti Daya a Cagayan, Pinaay ti BHB ken Umili

Iti daytoy a kapadasan ti NPA ken masa, ad-adda a napaneknekan ti kinapudno nga: gapu ta nainkalinteg ti ilablaban ken nairut ti panagkaykaysa – awan ti saan a kabaelan a sangoen



**P**inaay ti BHB ken umili ti operasyon brigada nga inrussuat ti 5<sup>th</sup> ID iti Daya a Cagayan. Nangrugi idi maudi a lawas ti Oktubre agingga iti Nobyembre 2002. Sinakop ti operasyon dagiti ili ti Penablanca, Iguig, Amulung, Alcala, Baggao ken Gattaran.

Inusar ti 5<sup>th</sup> ID ti 3 a battalion ti 501<sup>st</sup> Bde – 41<sup>st</sup> IB, 77<sup>th</sup> IB, 21<sup>st</sup> IB, dadduma pay a yunit ti 5<sup>th</sup> ID, ken maysa a kompanya ti 25<sup>th</sup> CAFGU.

Gandat ti operasyon a lapdan ken banganan ti rumegregta a panangilaban ti umili a mannalon kadagiti demokratiko a karbengan da. Ken iti pursigido a pananggunod kadagiti balligi da iti pannakaibaba ti interes ti pautang ken ti pannakaingato ti presyo ti mais.

Nobyembre 1, ginandat ti maysa a platun ti 41<sup>st</sup> IB nga asitgan ti disso a pagin-inanaan ti BHB iti Sitio Tug, Bitag Grande, Baggao. Idi simreken ti AFP iti perimetro ti depensa ti NPA, inisnapp ti maysa a tim ti NPA dagiti tropa ti kabusor. Dagus la a naudatal ti dua nga army. Napuskol ken nabayag a putukan ti sungbat ti kabusor.

Saan unay a nabayag, addan ti suporta da a helicopter. Nagrikrikos daytoy iti lugar ti labanan. Pinanggep ti helicopter nga agdisso iti daga. Ngem pinaputukan ti NPA ti helicopter. Dua ti natamaan.

Kalpasanna, nagsubli manen ti helicopter. Sa nagpaputok manipud ngato nga awan target ken direksyon. Resulta, 4 ti KIA ken 3 ti WIA iti kumpirmado a kasualti iti benneg ti AFP. Awan ti nadangran iti paset ti NPA.

Segun iti masa, laksid iti nasao a kasualti ti AFP, adda pay natay ken nasugatan kadakuada gapu iti panagpipinnaltog da met laeng. Ta dida ammo ti posisyon ti katropa da ken ti NPA. Simngaw met laeng daytoy a damag iti pannakakita dagiti tattao nga adda ilemlemmeng da a baklay a tao.

Kalpasan ti labanan, nagtultuloy ken pinairteng pay ti AFP ti operasyon da. Pinakaro da ti panangiluges da iti makatao ken demokratiko a karbengan ti umili. Kasla agmauyong da a nagrekisa kadagiti balbalay ti masa.

Linipitlipit da dagiti maatap a sibilyan a sumupsuporta iti NPA. Nagkabil ken nagtiliw da.

Nangitinnag da ti curfew. Kinontrol ti oras ti panagtrabaho. Ken ti panagbirok ti nayon a kabiagan. Imparit da ti mapan kadagiti pagbangbangkagan ken pagum-umaan.

Laksid iti dayta, nagkampo da iti kabalbalayan. Agipasasaknap da iti saywar ken anti-sosyal nga aramid – panagbartek ken sugal.

Saan a nagpangaddua dagiti umili a nangibulgar kadagitoy a panaglabsing ti karbengan a kas tao nga ar-aramiden ti AFP. Uray ti mismo a media ken ahensya ti gobyerno ket naiduron a tumignay tapno asikasoen da dagitoy a problema ti masa.

Uray kasano ti panangilemmeng dagiti militar kadagiti killo ken naranggas nga aramid, saan a malapdan ti irurukkuas ti kinapudno.

Iti dati a kinapalangguad ken kinaulbod da iti radyo brodkas, saanen a kimna. Gapu ta dinepensiba ida ti kinapudno nga imparangarang ti bukod da nga aramid.

Iti bangir dagiti adu a pamerperdi ken kinaranggas, nakabaelan ti masa ken hukbo a paayen ti brigada nga operasyon ti kabusor. **B**

# Dagiti operasyon militar ti AFP iti Quirino ken Abagatan nga Isabela, Danog iti Angin

Awan sarday ken aggigiddan nga operasyon militar iti tukad brigada ti nairussuat iti Abagatan nga Isabela ken Quirino idi bulan ti Setyembre agingga iti agdama. Ngem amin dagitoy ket napaay. Kagiddan dagiti operasyon ti nakaro a pannakariribuk iti umili ti lugar. Nalapdan ti panagubra kadagiti bangkag ken uma.

**September 10-21.** Inrussuat ti brigada nga operasyon nga indauluan ni Col Aurelio, CO ti 502nd Bde PA, a nakabase iti Soyung Echague. Sakup ti operasyon ti Jones, Echague, San Guillermo ken San Agustin. Nausar ditoy ti maysa a batalyon a tropa ti AFP manipud iti 45<sup>th</sup> IB, 54<sup>th</sup> IB, HHC 502<sup>nd</sup> Bde ken 52<sup>nd</sup> Recon Coy ti 5<sup>th</sup> ID.

Sinukisok dagiti nagoperasyon dagiti baryo ti Narra, Villacampo, Diasan, Madadamian, Mabbayad, San Miguel ken Benguet iti Echague. Aringgay ken San Francisco iti San Guillermo. Namnama, VillaBello, Dicamay 1, Dicamay 2, Sta Isabel, Minuri ken Sto Domingo iti Jones.

**Setyembre 10.** Awan permiso a sinerrek ken rinekisa ti tropa ti 52nd Recon Coy, iti panangidaulo ni 2Lt Calero, ti balay ni Bo. Kapitan Manuel Dulay iti Mabbayad, Echague. Pagsuspetsaan da a mangilemlemmeng ti ramit ken dokumento ti NPA.

**Setyembre 20.** Tiniliw ken pilit a pinaggayd ti tropa ti 52nd Recon Coy, iti panangidaulo ni Lt. Mabborang, ni Sonny Gapos, maysa nga ex-NPA, a taga So. Winingit, Dicamay 2, Jones, Isabela.

Iti San Guillermo, pilit nga inoblaga dagiti tropa ti B' Coy 45th IB PA dagiti umili, nangruna dagiti baryo opisyal, nga agidonar kadagiti materyales a kasapulan iti maipatakder a kampo da iti sentro ti San Guillermo. Malaksid kadagiti materyales, awan pulos kasukat a gunggona ti bannogda iti panangitakder ti nasao a kampo.

**September 18-23.** Iti panangidaulo ni Capt. Saddam, inrussuat ti 54th IB ti operasyon iti San Agustin. Sinukisok ti aganay maysa a kumpanya a tropa dagiti baryo ti Dumawing, Mapalad,

Bautista, San Antonio, Dabubo Grande, Salay ken Palacian.

**October 31. Strike Operation.** Malaksid kadagiti planado nga operasyon a kombatan, nangirussuat ti strike operation ti uppat (4) a platoon ti 45<sup>th</sup> IB iti Sitio Dalut, Benguet, Echague. Panggep da a kubkuben kano ti maysa a kampo ti NPA. Kas iti naglabas, napaay daytoy nga operasyon. Awan nabirukan da a kampo wenno NPA.

Kagiddan dagiti combat operations iti Jones, Echague, San Guillermo ken San Agustin (JESA) idi Oktubre, nairussuat ti operasyon militar ti 502nd Bde. iti probinsiya ti Quirino. Talmeg ti operasyon dagiti baryo ti Palacian ken Mapalad iti San Agustin, Isabela. Dumabato Sur, Villagrancia, Ysmael, Manglad, Diduyon, Anak, Cabuaan iti Maddela. Victoria iti Aglipay. Wasid, Disimungal ken San Ramos iti Nagtipunan.

Agarup maysa a batalyon a tropa ti AFP agraman CAGU ti inusar da iti daytoy nga operasyon.

**October 17, 2002.** Tiniliw ken pilit a pinaggayd ti tropa ti 54th IB, PA iti panangidaulo ni Lt. Vilchez da Noel Claro ken Noel Dag-o, agpada a mannalon ken agnanaed iti Bo. Ysmael, Maddela. Inimbestigar ken pilit nga impaaklon dagiti militar a miyembro kano ida ti Milisayang Bayan (MB). Pinilit da met dagitoy a mangisuro ken aggayd iti ammo da a kampo ti NPA. Awan ti naisuro dagiti masa.

Iti daytoy nga operasyon, nagreklamo dagiti umili iti panagkampo dagiti tropa ti AFP kadagiti kabalbalayan ti sibilyan ken kadagiti pangpubliko a pasdek kas ti inaramidda iti Bo. Ysmael, Maddela, Quirino. **B**



# Ginasut a ribu nga umili, rinambakan ti anibersaryo ti Partido

Iti intero a pagilian, ginasut a ribu ti nagtataripnong ken nagrambak iti nadumaduma a sona a gerilya iti kaaw-awayan ken kadagiti limed a lugar iti syudad tapno selebraran ti maika-34 nga anibersaryo ti Partido Komunista ti Pilipinas

**I**ti Cagayan Valley, nairussuat ti panagrambak iti innem a lugar kadagiti nadumaduma a sona a gerilya. Dinar-ayan daytoy ti ginasut nga umili, dagiti kameng ti Partido iti lokalidad ken intar ti Hukbong Bayan, mannakigubat ti NPA, kameng dagiti rebolusyonaryo nga organisasyon kadagiti sona a gerilya ken iti syudad.

Nangirussuat ti nadumaduma a kultural a pabuya. Inladawan dagiti kanta, daniw, sala, drama, shadow play dagiti balligi ti rebolusyon kadagiti naglabas ken dagiti pagebbengan iti sumarsaruno a tawen.

Pinasingkedan manen dagiti kameng ken kandidato a kameng ti Partido ti sinapataan da a panangipinget iti pannakidangadang.

## Kasla panagrambak ti dua nga aldaw a paskua

Iti paduyakyak ni Ka Roger, inladawan na ti selebrasyon a kasla Paskua. “Ti December 26 ket aldaw a paspasungadan unay dagiti minilyon a Pilipino. Tarigagay da a makitabuno kadagiti aktibidad a manglagip ken mangrambak kadagiti nagun-od da a balligi. Para iti umili, arigna’t panagrambak ti paskua iti dua nga agsaruno nga aldaw.”

Impalawag ni Ka Roger a “kadagiti lugar nga awan ti agtigtignay a kabusor, intero a komunidad ti dumar-ay iti panagrambak ti anibersaryo ti CPP. Nakasagana ti masa a pagnaen uray adayo ti pagirussuatan ti panagrambak.”



Iti maysa a sona a gerilya iti Isabela, makalawas a rinambakan ti Hukbo ken masa ti anibersaryo. Iti dadduma pay a larangan gerilya, naballigian a nagrambak ti Hukbo ken umili iti tengnga ti nasaknap nga operasyon ti AFP.

## Pammadayaw

Iti paduyakyak ni Ka Salvador del Pueblo, tagapagsarita ti NDF-Amianan a Daya a Luzon, sinaluduan na ti Partido iti “pannakagun-od kadagiti napapateg a balligi ti umili iti panangitandudo ti rebolusyon agraryo.”

Daytoy ti makagapu no apay nga “ipatapateg ti umili ti Partido ken ti hukbo na, ti New People’s Army,” panangtalmeg na.

Kasta met a pinadayawan na dagiti bannuar ti rebolusyon a da Janet Taguba (Ka Angel/ Ka Mikee), Rafael de Leon (Ka Mar), Franky Gelacio (Ka Arnold), Marvin Arbez (Ka Val) ken Danilo Galan (Ka Jonard), dagiti martir ti iti Dolores Quirino. Ni Rolando “Ka Rommel” dela Cruz, taga-Tabuk, nagbuis idi Marso 27 iti San Antonio, Cabagan, Isabela. Warly Nagasao iti Villa Campo, Echague, Isabela. Helen “Ka Mithi” Cabildo iti Metro-Manila.

Ti Partido ket naitakder idi Disyembre 26, 1968. Idadauluan na ti nailian demokratiko a rebolusyon ti Pilipinas. Idadauluan na ti New People’s Army nga agtigtignay ita iti nasurok 120 a sona a gerilya iti intero a pagilian. **B**

## Maika-38 Anibersaryo ti Kabataang Makabayan

Idi Nobyembre 30, napasingkedan manen a ti kabataan ti namnama ti masakbayan. Kas ti pinaneknekan ti naballigian a panagrambak iti maysa a sona a gerilya ti maika-38 anibersaryo ti pannakaitakder ti rebolusyonaryo nga organisasyon dagiti kabataan



**D**ua nga aldaw a rinambakan ti anibersaryo ti Kabataang Makabayan, rebolusyonaryo nga organisasyon dagiti kabataan, iti maysa a sona a gerilya iti Isabela idi Nobember 29-30.

Dinar-ayan daytoy ti nasurok-kumurang 150 aktibista a kabataan manipud iti syudad ken kaaw-awayan, dagiti kameng ti Hukbo ken rebolusyonaryo nga organisasyon masa.

Nairussuat daytoy iti laksid ti nasaknap nga operasyon militar iti lugar.

Saan met a lapped ti nalubo, naderra-as ken nagalis a dalan tapno turongen dagiti kabataan iti syudad ken kaaw-awayan ti lugar ti selebrasyon.

Adu kadagiti kabataan iti syudad nga ita man laeng a nakapadas ti narikut a pinnagna. Dakkel a balligi kadakuada a makasangpet iti sona a gerilya. Napunas ti aniaman a pannakabannog ti nabara a panagsarabo dagiti kakaddua ken masa.

Nangirussuat ti kultural a panagpabuya dagiti kabataan a naggapu iti nadumaduma a lugar. Kasta met dagiti Nalabaga a gerilya. Naipabuya ti kankanta, daniw, sala, drama, shadow play, ay-ayam ken flag dance.

Pinasingkedan manen dagiti kameng ti KM ti sinapataan da a panagserbi ken panagtignay para iti panangiballigi ti nailian demokratiko a rebolusyon.

Nangibingay ti mensahe ti Partido, Hukbo ken masa. Nabara nga inawat ti masa ti panagsapata ti walo a kabataan a nagpahayag ti panagsampa iti Bagong Hukbong Bayan.

Balligi ti panagrambak ti maika-38 anibersaryo ti KM. Nakonsolida ti intar dagiti kameng. Napairut ti panagkaykaysa da.

Naiparikna kadakuada ti kinapateg ti simple a panagbiag ken naregta a pannakidangadang. Babaen iti pannakipagbiag iti masa a mannalon ken Hukbo iti kaaw-awayan.

Nabunga ti panagsisinnukat ti kaammoan dagiti kameng. Naipangato ti kamulatan mainaig iti armado a pannakidangadang.

Naan-anay a naahita dagiti kabataan iti pakasapulan kadakuada iti Hukbong Bayan ken panangidur-as ti rebolusyon.

Malaksid ditoy, lallalo pay a napadur-as ti makamasa, siyentipiko ken nailian a rebolusyunaryo a kultura.

Dagiti kabataan ti saan a maab-abbatan nga ubbog ti rebolusyon. Isuda't pangnamnamaan iti panangitultuloy iti pangmabayagan a gubat ti umili agingga't balligi.

Ti Kabataang Makabayan ket naitakder idi Nobyembre 30, 1964. **B**



## TIGNAY PROTESTA ITI INTERNATIONAL HUMAN RIGHTS DAY

**N**asurok 250 mannalon ti nagmartsa-rali iti pananglagip iti Internasyonal nga Aldaw ti Karbengan a kas Tao iti Santiago City. Indauluan ti KARAPATAN-CV, PCPR-Isabela, DANGGAYAN-CV, DAGAMI ken daduma pay nga organisasyon ti umili.

Dimmar-ay met dagiti delegasyon ti mannalon manipud Jones, Echague, San Guillermo, Cordon, Cauayan, San Mariano, Benito Soliven ken Ilagan iti Isabela.

Kinondenar da dagiti kontra-umili a programa ti rehimen US-Arroyo ken ti administrasyon ni Gobernador Faustino Dy Jr. Nakailista ti KARAPATAN ti 28 a kaso ti panaglabsing iti karbengan a kas tao.

Iti report ti KARAPATAN, umad-adu ti bilang ti panaglabsing lallalo iti intar dagiti mannalon ken kabataan (*kitaen ti artikulo Panangliplipit iti karbengan sibil ken pulitikal*).

Nalatak dagiti kaso ti narungsot nga operasyon militar iti San Mariano ken Benito Soliven manipud idi Hulyo agingga ita, a nangbiktima ti adu a bilang ti mannalon ken dagiti nailian a minorya nga Aggay ken Kalinga.

Iti rali, pinuoran da ti effigy da GMA, Uncle Sam, Gobernador Dy, General Alvarado, Danding Cojuangco. Kuna dagiti nagrali, “isu dagitoy ti kangrunaan a manglablasing kadagiti karbengan ti umili iti Cagayan Valley. Isu da ti terorista!”

Idi Disyembre 9, inrussuat dagiti kabataan ti kultural a pabuya a pakaibilangan ti drama, kanta, daniw ken dadduma pay a pangkultura nga aktibidad a mangiladawan iti biag, kasasaad ken pannakidangadang dagiti mannalon iti Cagayan Valley.

Idi Disyembre 12-13, nairussuat ti kapada a tignay protesta iti Tuguegarao City. Dinar-ayan daytoy dagiti mannalon manipud iti Alcala, Gattaran, Baggao, Amulung, Rizal, Lasam ken Sto Nino. Ken dagiti tao ti simbaan, propesyonal ken estudyante iti Cagayan. **B**

## 8 NGA AKTIBISTA, INDARUM TI PNP

**W**alo a miembro ti Anakbayan-CV, maysa a progresibo nga organisasyon dagiti kabataan, ti naidarum iti kaso a “public disturbance” ti provincial PNP. Nilabsing kano dagiti kabataan ti Artikulo 153 ti revised Penal Code ti reaksyunaryo nga estado.

Idi Oktubre 17, nangirussuat dagiti kabataan ti information drive iti syudad ti Cauayan tapno ipablaak ti tignay protesta dagiti mannalon iti Ilagan itay Oktubre 18.

Kinondenar dagiti kabataan ken dagiti organisasyon a mangitantandudo iti karbengana kas tao ti panangidarum ti PNP. Kuna da, maysa a “panangliplipit daytoy iti basaran a karbengan ti umili.”

Basaran a karbengan ti umili ti nawaya nga agsarita, agipaduyakyak ken natalna nga agirusuat ti rali.

Idi Oktubre 17, naranggas a dinispers ken imbalud ti PNP-POSU Cauayan ti 8 a kabataan bayat nga agirusrussuat da ti info drive.

Dagus a timmulong ni Obispo Sergio Utleg ken dagiti lider mannalon iti pannakairuar da iti pagbaludan. **B**



## "HUSTISYA! WAYAAN TI CORDON 7!"

"Hustisya ken dagus a pannakawaya ti Cordon 7!" Daytoy ti pukkaw dagiti mannalon a kameng ti Caquilingan Farmers' Association (CFA), Danggayan dagiti mannalon ti Isabela (DAGAMI) ken KARAPATAN iti tignay rali iti syudad ti Santiago idi Disyembre 5.

Sakbay ti martsa-rali, dimmar-ay da iti panagusig ti "arson" a darum laban kadagiti lider ti CFA.

Pinuoran kano ti 16 a mannalon dagiti puon ti mangga iti daga a tagtagikuaen ti pamilya Roque ken Villaluz.

Ibagbaga ti pamilya Roque nga adda kano iggem da a titulo. Ngem sinuppiat dagiti mannalon daytoy. Kuna da a bogus a titulo ti iggem ti pamilya Roque. 1948 pay idi rinuggian dagiti mannalon ti Caquilingan a padur-asen ti daga.

Impaduyakyak ni Melchor Batalla ti DAGAMI a maysa laeng a pamuspusan ti darum tapno lipiten dagiti militante nga organisasyon ti mannalon. Ken ikriminalisa dagiti kaso nga agraryo.

Sakbay a naidarum dagiti mannalon, immunan a binuldoser ken inaladan da Roque ken Villaluz dagiti suksukayen a daga dagiti taga-Caquilingan. Adda pay dagiti kaso a pinaturongan ken pinaputokan da ti paltog dagiti lider-mannalon ti CFA.

Agingga ita ket nakabalud ti 7 mannalon iti pagbaludan ti PNP Santiago City iti Batal bayat a maus-usig ti kaso da iti RTC Branch 36 ni Judge Anastacio Anghad.

## WELGA, NANGPADISI KADAGITI PRESIDENTE TI NVSPC KEN QSC

**D**ua a presidente iti dua a kolehiyo a pang-estado ditoy rehiyon ti napadisi babaen ti panagwelga dagiti estudyante ken manursuro. Ni Dr. Ricamonte ti Quirino State College iti Diffun. Ken ni Dr. Patricio Unday ti Nueva Vizcaya State Polytechnic College iti Bambang.

Idi Oktubre, napadisi ni Dr. Ricamonte ti Quirino State College gapu iti adu a kaso ti sexual harassment nga imbulgar dagiti babbai nga estudyante. Sakbay a napadisi, pinadayawan pay ti Malacanang ni Dr. Ricamonte kas modelo nga empleyado kano ti gubyrno.

Idi Nobyembre 13, nairussuat ti protesta dagiti estudyante ken dagiti propesor ti NVSPC. Kinondenar da ti korupsiyon, kinakunniber ken diktatoryal a panangtarawidwid ni Dr. Unday iti eskuelaan. 92 iti kabuklan a 126 titser ti nagpirma iti manifesto a nangideklara ti kinaawan talek kenni Presidente Unday.

Iti botos nga 11:1, impasa met ti Sangguniang Panlalawigan ti Nueva Vizcaya ti resolusyon a nagdeklara a nasken a masukatanen ti presidente ti NVSPC.

Kalpasan ti dua a lawas, naglusulosen ni Dr. Unday babaen ti panangidasar ti leave of absence. Tartarawidwidan ti Konseho dagiti Dekano ti iskuelaan bayat nga awan pay kasukat ni Dr. Unday.

Indeklara dagiti estudyante ken akademya a balligi ti inrussuat da a welga.

Kadaytoy dua a kaso ti tignay ti estudyante, manursuro ken empleyado, napanekekan manen ti bileg ti militante a kolektibo a panagtignay. **B**





## PAKSIATEN TI MALARIA!

“Awanen ti gurigor ko. Saanakon agtumar!,” ti kuna ti maysa a kaddua.

“Indigos kon iti karayan, nakigtuten ti malaria. Pimmanawen ti malaria kon!”, kinuna ti maysa pay.

“Napait unay ti agas. Madikon. Maagasan to latta!”, ti inmurareg ti maysa pay.

“Natamayak san? Apay nga agsubli-subli metten ti gurigor ko?” “Nagagas ak met, kaddua. Awan latta ti panagdur-as na. Isu a nagpa-atang kamin!” kuna ni Tang Pelay.

Nadumaduma a panagusig. Nadumaduma a pannakaawat. No agtultuloy ti kastoy a panagkita, mabalin a kumaro pay ti sakit. Lallalo nga agwaras. Agbalin nga epidemya. Ken no kumaro ti kumplikasyon, mabalin a pakatayan ti pasyente.

Ania kadi ti sakit a malaria? Nasken nga ammoen ti galad ti sakit tapno epektibo a maagasan wenno mapaksiat daytoy.

Iti naglabas a tawen, adu a kakaddua ken masa ti intake ti malaria. Nirebyu dagiti opisyal medikal ken ti Komite ti Partido iti Rehiyon ti panagsaknap ti sakit. Pinairut ti panagadal iti panagagas. Kagiddanna, pinasingkedan manen ti pakasapulan iti panangirussuat ti kampanya a kontra-malaria.

Naagasanen dagiti nagsakit. Nasken nga imentina ti nagun-od tayo a panagdur-as iti panagagas. Ipasaknap dagiti nalagom tayo nga adal.

### TI PARASITO

Ti malaria ket maysa a klase ti impeksion iti dara gapu iti parasito a *Plasmodium*. Endemiko wenno saan pay napukaw daytoy iti Cagayan Valley. Nangruna iti forest region ti Cagayan, Isabela ken Quirino.

Uppat a klase daytoy a parasito. *Plasmodium vivax*, *Plasmodium falcifarum*, *Plasmodium ovale*, ken *Plasmodium malariae*.

*Falcifarum* ti kakaruan nga impeksion, gaputa mabalin a makaigapu iti malaria iti utek (cerebral malaria).

Maiyakar daytoy babaen ti kagat ti maysa a klase ti lamok, *Anopheles sp.* Saan a maala wenno maiyakar babaen iti makan, danum a mainum wenno pannakidenna.

### DAGITI SINTOMAS

Ti kadawyan a padron a pagilasinan ket ti panaglammin, panaggurigor ken nakaro a panagling-et.

Ti dadduma pay a sintomas malaksid iti padron ket ti nakaro a panagsakit ti ulo. Panagsarwa. Panagdul-ok. Panagburis (lalo kadagiti ubbing). Ken panagsakit ti laslasag wenno maskulo.

No *Vivax* ti klase ti malaria, nalawag ti padron a 3 a tukad - panagtigerger, gurigor ken panagbaba ti temperatura ken panagling-et.

Iti *Plasmodium falcifarum* ket saan unay a nalatak ti 3 a tukad a sintoma. Mabalin a saan a makita ti padron iti falciparum malarya. Mabalin a ti sintomas ket makagurgurigor laeng wenno kasla agtrangkas.

No adda kumplikasyon, kayat na a sawen, daytoy ket falciparum a malarya.

### DAGITI KUMPLIKASYON

**Malarya iti Utek (cerebral malaria).** Makita babaen ti nakaro a panagsarua, nakaro a panagsakit



ti ulo, pagalimbadaw, pannakaawan ti puot ken kombulsyon. Daytoy ti kadawyan a gapu ti pannakatay ti pasyente.

**Malarya iti bato (*black-water fever*).** Nalatak a mailasin gapu ta nalitem ti isbu a kasla kape. Mabalin a bassit wenno awan ti isbu ti pasyente.

**Malarya iti bara.** Namaga ti uyek. Adda dara iti plema. Ken marigatan iti panaganges ti masakit.

**Nakaro nga anemya.** Aglulusiaw, kanayun nga agkakapsut ken maul-ulaw.

**Pannakaawan ti asukar iti dara.** Kankanen ti parasito ti sustansya iti bagi. Agling-et ti nalamiis. Agkakapsut ken maawanan puot.

### **PAMUSPUSAN TI PANAGLIKLIK**

Dakkel ti maitulong ti panangliklik iti sakit. Saan nga urayen nga umatake ti malaria. Nasken nga aramiden dagiti sumaganad:

**Liklikan ti kagat ti lamok.** Agmuskitero agingga't kabaelan. Nasaysayaat no maiyuper ti muskitero iti insektisayd a Permethrin. Aramiden a kampanya wenno proyekto ti baryo daytoy. Agbado ti long islib aglalo iti rabii. Agpaasuk wenno agatong.



**Paksiaten ti lamok.** Dadaelen ti pagbalbalayan da. Gaburan dagiti lugar a nakaurnungan ti danum. Ken ikkaten dagiti mulmula iti igid ti waig. Kaluban ken dalusan dagiti paggianan ti danum.

**Agusar ti pangpatay ti lamok.** Ispreyan ti diding ti balay sakbay a maturog. Aramiden a proyekto ti baryo ti panagisprey iti lawlaw. Mabalin ti Malathion.

**Agmula ti neem tree, eucalyptus, lemon grass, ken dadduma pay.** Mabalin nga ikkan ti lames a mangmangan ti itlog ti lamok dagiti dandanum.

**Agtumar ti propilaksis.** Sakbay a mapan iti lugar nga addaan ti malarya, uminom ti dua a tableta ti Chloroquine maysa a lawas sakbay a

mapan iti lugar. Linawas bayat ti kinaadda na iti lugar. Ken agingga 2 a lawas kalpasan a pimmanawen iti lugar nga endemiko. Ti propilaksis ket saanen a tomaren dagiti datin nga agin-indeg iti lugar.

### **PAMUSPUSAN TI PANAGAGAS**

No adda iti lugar nga endemiko ken adda marikrikna a sintomas kas ti panaglammin, panaggurigor ken nakaro a panagling-et, agtomar a dagus ti agas ti malaria.

**Para iti umuna nga atake.** Agtomar ti Chloroquine 250 mg a tableta (Aralen). 4 a tableta (1000 mg) iti umuna a panagtumar. Kalpasan ti innem (6) nga oras ket dua manen a tableta. 2 a tableta ti maikadua nga aldaw. Ken dua a tableta ti maikatlo nga aldaw. Isu a sangapulo (10) a tableta amin ti ipatumar.

Tapno nasapa a maammoan ti kumplikasyon, nakapatpateg a maamoan no ti malarya ket gapu iti vivax wenno falciparum babaen ti panageksamin iti dara wenno "malarial smear." Umasideg iti opisyal medikal tapno maaramid daytoy.

**Panagagas ti vivax.** Agtomar ti chloroquine ken primaquine. Suroten ti doseysd a makita iti *Doseysd ti Panagtomar iti panid 27*.

**Panagagas iti falcifarum nga awan ti kumplikasyon.** Agtomar ti chloroquine (10 a tableta umuna a tallo nga aldaw); pyrimethamine-sulfadoxine (P-S) kas ti fansidar (3 a tableta iti maysa a panaginom iti maika-uppat nga aldaw); primaquine (3 tableta iti maysa laeng a panaginom).

**No saan nga aglaing iti Chloroquine,** mabalin nga adda resistensya na ti parasitiko iti daytoy nga agas.

Patomaren ti Artemether-Lumefantrine (Co Artem). Wenno dagiti agas para iti kumplikado a malarya.

Ti Co-artem ket baro nga agas ken mabalin nga awan pay iti lugar.

**Falcifarum nga adda kumplikasyon.** Ipatomar ti quinine 10 mg iti kada 1 kilogram a timbang ti pasyente kada 8 nga oras iti uneg ti 7 nga aldaw. Ken Tetracycline 500 ti uppat a beses kada aldaw iti uneg ti 7 nga aldaw (ruggian iti

**DOSEYDS TI PANAGTOMAR TI CHLOROQUINE KEN PRIMAQUINE**

TAWEN TI PASYENTE	CHLOROQUINE			PRIMAQUINE
	UMUNA NGA ALDAW	MAIKADUA NGA ALDAW	MAIKATLO NGA ALDAW	ITI UNEG TI SANGAPULO KET UPPAT (14) NGA ALDAW
<b>Nababa iti 1 tawen</b>	kaguddua ti tableta	kaguddua ti tableta	kaguddua ti tableta	San a mabalin a patomaren
<b>1 - 3 tawen</b>	maysa a tableta	maysa a tableta	kaguddua ti tableta	apagkapat (1/4) ti tableta
<b>4 - 6 tawen</b>	dua a tableta	maysa ken guddua a tableta	maysa a tableta	kaguddua ti tableta
<b>7 - 11 tawen</b>	dua a tableta	dua a tableta	maysa a tableta	tallo ti apagkapat (3/4) ti tableta
<b>12 - 15 tawen</b>	tallo a tableta	tallo a tableta	maysa ken guddua a tableta	maysa a tableta
<b>15 tawen agpangato</b>	uppat a tableta	uppat a tableta	dua a tableta	maysa a tableta

maika-5 nga aldaw). No adda dagiti sintomas ti kumplikasyon, ken awan ti opisyal medikal iti asideg, itaray a dagus iti ospital.

No ti pasyente ket awanen ti rikna na, saanen a makariing, awanen ti puot na wenno comatose, itaray a dagus iti ospital wenno iti medikal ti BHB a makaammo iti panangipakat ti dextrose nga asukar. Dakkel ti posibilidad a nababa ti asukar iti dara a maysa a kumplikasyon ti falciparum malariae. Isu a saan a mariing wenno mapukawan isuna ti puot.

No saan a sigurado no malaria wenno tipus ken nakaro unayen ti sakit ti pasyente, aggidan nga ipatomar ti Quinine ken Ciprobay. Itaray a dagus iti ospital.

**DAGITI PALAGIP**

1. Saan a mabalin iti kaiyanak ti Primaquine ken iti ubing, ti tetracycline
2. Saan a mabalin kadagiti masakog ti Pyremethamine Sulfadoxine, Primaquine ken Tetracycline.
3. No saan a kabaalan ti saan a nasayaat nga epekto ti quinine, ibaba ti dose yds iti 1/3 ti

**FANSIDAR (maysa laeng ti dose yds)**

<b>AGINGGA 4 A BULAN</b>	¼ TABLETA
<b>4 - 11 BULAN</b>	½ TABLETA
<b>1-3 TAWEN</b>	¾ TABLETA
<b>4-6 TAWEN</b>	1 TABLETA
<b>7-11 TAWEN</b>	1 KEN ½ TABLETA
<b>2 -15 TAWEN</b>	2 TABLETA
<b>16 - AGPANGATO</b>	3 TABLETA

regular a dose yds.

4. Ti primaquine ket mangpaksiat ti parasito iti dalem nga gapuanan ti maul-ulit a vivax a malarya

5. No saan a makatalna wenno awanen iti puot, ikkan a dagus ti inumen nga asukar (gatas, juice wenno softdrink) gapu ta mabalin a nababa ti sustansya nga asukar iti dara.



# ITI IPAPANAW KO

NIDALEN TAJANLANGIT

KADDUA,  
Iti adu a saludsod  
A diak kabaelan a sungbatan  
Nagserbi ka a manursuro  
Iti nabiit a panawen a panagsinnarak  
Nangibin-i ti pangrugian  
A bukel ti kinapudno  
Iti kaunggan a mawaw

KADDUA,  
Agyamanak kadagiti talakayan  
A nagpatadem iti panunot, nangpataud  
Kadagiti ragragsak  
Nga iti tunggal kanito ket napateg

Imbalikas mo  
"amin a banag ket addaan pulitika"  
Kas ti tunggal panagputok ti paltog  
Kagiddan ti panagpadur-as ti bukod a bagi

KADDUA,  
Ammok a saan nga umanay  
Ti sapata nga imbatik  
Nga agsubliak to  
Ta kunam ngarud  
"Praktika ti mangpartuat  
iti tunggal panagkeddeng"

Sadino kad' pay papanan da?  
Agsinnarak ket agsinnarak latta  
Dagiti dalan ta  
Gapu iti namagkaysa a panggep  
A wayaan ti tunggal maysa  
Ken ti pagillan

KADDUA,  
Itatta mas nalawlawagan  
Ti panunot a makulkullaapan  
Iti ipapanaw ko  
Saan na kon mangibati pay  
Ti adu a balikas ti kari  
A siak ket agsublin to  
Gapu ta naibati ti kaunggak  
Iti sidong dagiti kakaddua  
Iti suli daytoy a kabakiran  
A nangaywan ken nangilili  
Iti karissabong a kaunggan  
ken nangpapijsa't nakem  
A ringbawan dagiti kakapuyan

Awan panagduadua, nabatik  
Ti pusok iti kaaw-awayan...  
Ken agur-uray iti panagsublik  
Ken iti adu pay a kapadak nga  
Agtartarigagay a wayaan ti pagilian



*Ni Ka Dalen ket maysa a kameng ti Katipunan ng mga Gurong Makabayan (KAGUMA), ti rebolusyonaryo nga organisasyon dagiti manursuro.*

## TANO



PAGSASARITAN TI BHB KEN MASA PANGGEP TI UMADANI  
A SELEBRASYON TI ANIBERSARYO TI PKP

DISYEMBRE 26. ALDAW TI PANNAKAITAKDER TI PARTIDO-MLKMZ. NAGBALLIGI TI SELEBRASYON. NASUROK LIMA GASUT TI DIMMAR-AY.

